

續金華叢書



金華賢達傳卷六

續金華叢書

明 鄭柏著

政事

宋厲汪傳

厲汪字萬頃東陽人登隆興元年進士第官止三山倅兼西州宗丞積階朝散郎累贈中奉大夫嘗簿樂清宰永嘉民以厲佛子稱之手模以思入仕五更磨節官至正卿所至著稱號屏山老人孫髯翁御賜名文翁淳祐末尹京邑當就試禮部特旨廷對登進士第歷太府卿權戶貳繼除知紹興府

宋喬夢符傳

喬夢符字世用東陽人從呂祖謙學嘗作不欺論謙奇之登淳熙二年進士第知徽州歙縣邑有大達苗水衝居人苦霖潦夢符為堤渠人免水患號喬公街累遷大理正奉旨鞠訊郭倬宿州獄不畏權勢獄具進除監察御史尋卒有西覓類稿十卷子幼聞以思入仕登紹

定龍飛進士第嘗爲宗正丞孫侶孫嘗爲右司轉朝議大夫從姪嘉  
字吉甫嘉泰二年進士亞魁僉判饒州卒孫倣孫以恩補官至承直  
郎

宋倪千里傳

倪千里字起萬東陽人七歲能默誦九經入上庠學者宗之登淳熙  
十四年進士第議論文墨籍甚一時擢御史退食蕭然如山居遷右  
正言以言事忤大臣除起居舍人兼國史編修實錄檢討並兼侍講  
卒于位特贈右文殿修撰階朝奉大夫子允文奎皆襟度都雅詞章  
光艷克稱其家允文以恩授黃巖縣監鹽卒奎踐科場不利卒奎子  
哲領鄉薦

宋孫昶傳

孫昶字居敬東陽人未冠入太學中淳熙十四年進士第從奉使入  
北累遷太學正輪對慷慨上褒嘉之遷博士丞會京尹辱武學生昶  
抗論力爭遂白外差知漢陽軍六館之士冠帶出餞都人以爲美談

尋知黃州憲湖南所至有善政終兵部郎官有畸菴集大學講義及詩十卷子德之登紹熙二年進士第又中宏詞科爲國子博士添孫建寧猶子瀾字巨源嘉定元年上舍登第瀾孫繼學寶祐元年進士授鎮江教授

宋李大有傳

李大有字謙仲東陽人與弟大同怡愉講切友愛爲閭里所稱入太學登慶元三年進士第通判通州遷太常博士卒于官其在通州民常苦旱大有巡視地勢鑿山浚河引江水以溉田自是歲以大稔商舶通行人皆利之攝郡事却事例錢不受吏服其廉子自勉以恩授江陰軍不赴自道以叔大同貴補常寧丞

宋徐雄傳

徐雄字子厚東陽人幼而能文擢開禧元年進士第淹回州縣端平中喬行簡薦授書庫官累遷國子博士再轉秘書少監兼國史編修積階朝奉大夫奉祠以歸雄居朝清峻議論不阿嘗奉臺省命鞫爾

處疑獄皆雪其冤所著有易解漢許南圃詩稿弟剪毅俱由西雍登武舉進士第剪魁偉雄畧佐戎制閩權知濠州以卒毅戎司制議官子璇入太學登嘉熙二年進士第爲隆興府觀察推官

宋趙希伋傳

趙希伋字景思昌陵九世孫建炎南渡寓居東陽登紹熙元年進士第強敏不撓廉公有威嘗任帑轄發摘奸弊知瑞州衡州提舉湖南吏民畏愛遷兵部郎官轉江西提舉積階朝議大夫以卒希伋兩秉州麾一持使節所居有田不足供心臘子三人皆入仕孫孟儻登進士監潭州鎮弟希偁守建昌

宋厲仲方傳

厲仲方字約父東陽人閉戶讀書經融傳浹並試兩學博士稱之淳熙元年擢武舉進士第一守安豐奏淮北飢民扣關求救議者指爲開邊生事北邊旣卒叛盟仲方竟坐貶死從弟樞嘉泰元年武舉進士知竺山縣樞子寧太學上舍侖武學上舍淳祐十年同進士

宋馬王仲傳

馬王仲字次辛家本建陽從朱熹游擢紹熙元年進士乙科寓居東陽遂爲縣人歷仕州縣以廉能稱嘗知古邳撫循兵民捍禦邊寇郡賴以安尋上祠請歸王仲議論典刑詩章閒雅所著有得齋孫世穎以恩監潘封酒庫世綸爲湘潭宰

宋周師銳傳

周師銳字儀父東陽人嘉定元年武舉進士第一仕至閣門舍人知英德府歸班又知封州以卒師銳本名進士不得志於場屋故就右科廷對疊疊萬言貫穿伊川師卦之旨真德秀考藝異之遂置上第且曰此雖文舉亦當爲首選嘗兩副奉使入國嶺南歸裝不持南物孫野老以恩監寧海縣鎮

宋郭始中傳

郭始中字權父東陽人登嘉定進士第分教柳楊置進士莊上舍莊以激昂士氣歷官權駕部著作郎知徽州以卒

宋陳琰傳

陳琰字中叔東陽人精春秋韓申韜畧入右庠嘉定十六年擢武舉進士第二時母兄宣子由太學內舍同年登第一門兩科人以爲榮仕殿步兩司裨贊非一端平間召試後省除閣門舍人出知辰州撫綏軍民安輯溪洞終于郡治有太平十議雜著春秋三傳解子克剛以恩補嚴陵稅官

贊曰東陽爲吾郡大邑人物之懿視他邑爲尤盛南宋以來踐魏科登進士駢累相望其致身法從登庸台輔者固已赫然昭著勳績然或奇蹇蹭蹬未遂顯達而造履爲政皆有可觀者焉若汪之取譽琰之撫綏雄之雪冤衲之抗論始中之置莊激士壬仲之捍禦撫循夢符之築堤建渠大有之鑿山峻河師銳之歸裝無累千里之宦寓蕭然仲方以救飢民而貶死是非學術之正其能然乎至于希伋以宗室之胄秉麾持節有田不足以供伏臘斯又天分之高歟

宋張翊傳

張翊字宗誠武義人皇祐間任江東提刑司馬光范鎮皆有詩送之  
子肅登天聖進士第歷太常博士知岳州子二人曰巽登嘉祐造士  
歷道州司法參軍曰節知明州昌國令巽子具中登紹聖第仕至處  
州通判具中三子皆仕仲曰曼卿官至御史中丞曼卿二子曰適正  
曰茂皆授郎署致仕孫漫字清源號雲谷慶元二年預鄉試選尋用  
蔭補官後銓試吏部累官主管尙書吏部架閣文學積階奉議郎守  
大社令致仕

宋徐溫傳

徐溫武義人登嘉定進士知雷州轉湖南運使弟汲請鄉舉授南海  
尉子曰矩中淳熙世賞科官至朝奉大夫從子煥預嘉定榜歷官司  
農寺丞守南雄渙子道隆見忠義傳

宋楊邁傳

楊邁字德夫武義人嘉泰入太學補教授累官朝議大夫寶謨閣待  
制賜紫金魚袋致仕卒贈龍圖閣學士正議大夫諡文簡子璪字溫



如由太學奏補承務郎歷台溫福三州倅次子瑱字安如登紹定第  
累官署兵部侍郎知寧國環之子見預淳熙庚戌榜任寶慶教授止  
從侍郎

宋趙汝淦傳

趙汝淦字成父武義人登嘉定元年第歷階朝議大夫太府寺簿署  
知信州未上主成都玉局觀爵金華開國男賜紫金魚袋子崇詠以  
澤補將仕郎終平陽令孫三人長曰必源嘉祐戊午請監舉授廸功  
郎衢州司戶其弟汝鍵從弟汝鋤同登嘉定第歷階承直郎汝瑩之  
子崇辨三請監舉登淳祐榜授修職郎歷浙東提幹汝鍵之子崇節  
登第官至瑞安縣尉

贊曰張翊徐溫楊邁趙汝淦生同郡邑皆以儒科發身後先登第致  
位顯達而其子孫又能繼承家學累葉光榮簪纓珪組照耀閭里所  
謂學不負人誠哉是言也

宋范大錄傳

范大錄蘭谿人爲本縣吏行案公平不撓法以求賂雖貧糞甘心焉  
中年無子因遊監司至白沙收一流離女子後生一男官至少卿生  
二子一爲郎官一爲提舉諸孫相繼登第大錄追贈正議大夫  
贊曰大錄以一縣吏乃能廉平守法雖糞不移度越于人遠矣而其  
子孫繼取科第簪紱蟬聯大錄亦膺贈典天之報施善人亦至矣哉  
世之枉法納賄者獨何心歟

宋趙權傳

趙權蘭溪人以才氣自豪宣和初睦寇猖獗權詣將閫獻計殺賊境  
內以安安撫使上其功補廸功郎充本縣尉

宋葉介傳

葉介字方叔武義人淳熙八年進士歷官通判邵武軍泉州南海寇爲  
亂介召軍將密授方畧遂擒羣盜後以奉直大夫主管台州崇道觀  
而卒

贊曰趙權獻計殺賊葉介用畧擒盜皆有功于民者列官進秩不亦

宜哉則凡建功立德者其可少怠乎

宋吳傳傳

吳傳字清叟浦江之通化人自少惟嗜讀書中宣和進士第歷官至監察御史四持憲節廉明之聲著稱于時

宋石範傳

石範字宗卿其先由青社來徙浦江大母杜氏以女妻鄭剛中人服其先見範從呂祖謙游中紹熙元年進士調奉化尉歲飢貧民將爲變範賑之而定海寇爲亂範設計捕殺之改知麗水遷婺源縣俄權通判袁州攝州事練軍撫民威聲甚震峒獠不敢近轉通判泉州兼南外宗正丞卒範守正不撓或勸其謁權貴人美官可立至範謝曰吾儒者改官爲縣亦固當耳何以僥倖爲卒不詣士論多之弟籌亦能文嘉定進士官吉州司理

贊曰傳範皆浦江人而以廉能著稱于時斯可謂賢士矣範之不謁權貴以僥倖進取豈非學行之高歟

宋潘時傳

潘時字德廊金華人受教于仲父良貴任爲登仕郎累官提舉浙西茶鹽平江庫錢失漏守誣富室取償檄罷之守怨搆以他事坐削一官移江西累遷提舉湖北茶鹽改南路提點刑獄有盜殺人而誣指賈人者白其冤出之除知廣州兼主管廣西東路經畧安撫使公事捕殺大惡梁氏兄弟號白彪者改知潭州安撫湖南再遷尙書左司郎中不就以疾卒累階中大夫金華縣開國男孫履孫字坦翁仕至奉議大夫通判江陵府

贊曰吳師道敬鄉錄稱德廊遊張栻呂祖謙間故居官威著風蹟當時號稱精吏道而寬猛得宜者無出其右又云時嘗與朱熹雅契故熹爲其誌墓云

宋黃裳傳

黃裳字元佐浦江人穎悟嗜學名稱士林而尤敦誼行嘗讀范仲淹義田記遂捐常稔田二百畝儲租以濟隣族告急者卽賜之置籍以

計其出入名曰擬范晚年登進士第調三衢司戶暇日與士友觴咏  
爲娛有詩文數百篇達官咸敬禮之郡守朱士麟稱其儒林模楷前  
輩典刑章奏于朝未報而卒長子從龍登進士官至節幹文學行誼  
見稱于時次子友龍登進士擢史館編修孫璘咸淳庚午中文武兩  
科孫琦元以儒士舉爲武義縣學教諭裳弟夢弼登進士官至西京  
節幹姪震龍登咸淳進士以養親不仕姪仲龍登進士官至秘書省  
校書郎解職家居寇掠鄉里而火其廬以刃脅其降仲龍不屈罵不  
絕口而死侄孫珪元以儒士舉爲月泉書院山長裳六世孫以禮字  
儀可經明行修洪武庚申以賢人君子應召擢廣東按察司僉事能  
聲著稱尋卒于官七世孫道斌字叔厚由國子生任刑部司門主事  
雪寃理枉獄無滯囚尋分理鳳陽太平二府政績藹然時屯田夫多  
死亡寡婦無依道斌奏請悉聽還鄉人咸德之道斌姪如瑟今亦以  
文學行誼稱于士林

贊曰裳讀義田記而割田廩粟以資鄉隣可謂勇于爲仁者矣而其

子孫衣冠累葉咸登仕版而揚政績以至于今蕃衍愈盛益亢厥宗  
匪振其家聲仁者必有後其信然矣乎

金華賢達傳卷六

Blank columns for text.

金華賢達傳卷七

續金華叢書

明 鄭柏著

政事

元吳直方傳

吳直方字行可浦江人有志操嘗習刑法于帥府及行中書復北走京師一身逆旅中凡三十六年備歷困苦志不少變後主留守馬札兒台家教其子脫脫及脫脫貴顯薦爲丞相府長史重紀至元末權臣專政上與近臣謀罷其政柄直方協贊有功召至便殿賜以黃金繫帶超授集賢直學士再轉陞學士時脫脫爲右丞相國有大政多咨之直方每引古義告之未幾上章乞骸骨以大學士榮祿大夫致仕食俸賜終身至正中監察御史劾直方躐進官階奪其誥命除名爲民他御史辨其誣復之

元趙大訥傳

趙大訥一名良勝字敬叔浦江人起家譯曹掾歷官龍溪尹俗尙鬼



壘石作祠以奉神大訥投神江中移石以修孔子廟縣多洞獠弄兵  
暴掠大將出屯經年不解大訥謂御以術服從如良民累遷知永新  
州除盜辨奸興利除害聲稱燭然尋以老告歸同時有金德潤君澤  
者亦浦江人由湖南廉訪司掾歷官至嘉興府推官亦以政事稱于  
時

贊曰人物記稱直方處大事縱羣言拂騰不爲少移雖貴顯謙下待  
人恆如布衣時大訥屢典劇縣皆有能聲平反冤獄民多感之爲立  
生祠噫是豈非大丈夫能以功業自見者乎

### 元王安國傳

王安國字靖翁東陽人嘗喜讀孫吳書以門功當授成忠郎宋祚將  
傾不果上元至元中宋旣納土而人心未輯以策干帥高興陳撫綏  
之計興與語意合卽署爲東陽尉縣民婁覃等恃玉山險相挺爲亂  
殺宣尉使陳天祐行省左丞史弼領兵討之安國進謀親入賊窟以  
計誘之手縛渠魁以獻弼大喜將薦用之以親老固辭後寧海妖賊

楊鎮龍反玉山接境寧海據爲巢穴勢甚猖獗安國率鄉兵拒之賊間趨義烏未幾與官軍遇衆潰賊首受擒安國有力焉

贊曰王禕傳安國稱其爲尉謹厚威信民有訟不之邑令而惟尉是直鄉閭賴以安靖者二十年民懷其德有祀其像于家者噫是豈非勇而能仁者哉

元陳達大傳

邑志作遠大

陳達大字宏父浦江人少從鄉學治尙書經義而倜儻有爲時邑里初附山谷獷強蜂聚爲寇達大建畧執其渠魁而平之幕府上其功得試辰州路施容州判官累遷温州路平陽州判官所至多著政聲俄患風痺遂自免歸宴處一室題曰達觀子士元梧州路儒學正次士貞鈞臺書院山長

贊曰達大初治經義以文易武平寇治民咸著政蹟而教二子皆登儒籍斯爲不墜其學矣

元鄭深傳

鄭深字仲幾浦江人父銳字景敏奉母至孝以深貴贈樞密院判官仲幾負氣不羈游學京師受知太師脫脫延教其子舉爲太傅府長史遷宣文閣授經郎再遷中書員外郎以親老乞便養改僉江南浙西道肅政廉訪司事轉僉江東建康道階奉訓大夫未上卒仲幾居官多著政蹟在宣文閣教勛戚子後皆爲名臣進講經筵每有金織文幣之賜姪杙敦厚寬恕好學有文士林稱之贊曰宋太史稱仲幾爲奇偉士蓋其立志于少年之日卒能成功名于強壯之時非奇偉之士其能然乎

元王餘慶傳

王餘慶字叔善金華人受業許謙之門嘗游京師有番僧官爲總統者勢焰烜赫得其一言官爵可立至或以其名聞僧召之拒曰吾學將以伸吾正道寧有屈身而道可伸耶京師悉服其行至正初入經筵爲檢討累拜會稽監察御史文聲稱著後使廣東詢問疾苦惠政爲多

元傅光龍傳

傅光龍字子才義烏人初與兄子賜皆宋太學生景定甲子詔求直言偕同舍葉平等上書斥賈似道之奸葉李竄瘴地光龍兄弟遂遁跡歸隱青岩之梅溪學者稱爲梅溪先生元世祖取江南葉李應詔入中書爲右丞光龍兄弟館其門後兩典郡學三佐民社皆有善政光龍終候官縣簿

贊曰餘慶受業許謙造履純正觀其拒番僧之召其行可知故能歷躋臺諫彰著政蹟可謂不負所學矣光龍兄弟排斥似道已而退隱不亦知進退之幾者歟易代而出典學佐令雖位不稱才而善政有稱矣

明呂文燧傳

呂文燧字用明永康人曾祖鑰仕元爲永康尹祖汲置義田以食族人立義學以教宗族子弟燧承先志行義著稱元季驛騷逆盜掠永康侵擾隣邑文燧散貲與弟文燁召募丁壯親與盜戰盜敗走斬獲

甚眾傍邑皆賴以安天兵克婺立永康翼以文燧爲左副元帥兼知縣事時文燧以事留杭命其弟文烜攝之上聞又以文燧爲庸田司經歷改中書省管勾再轉爲嘉興知府松江民作亂襲嘉興文燧走使者告總兵卽遣兵擒獲之諸將欲屠城文燧爲言而止考滿乃入朝奉詔諭閩婆國次興化俄有疾卒于驛舍

明吳履傳

吳履字德基蘭溪人通春秋學能詩尤工行草書國初召爲州儒學正累官知濰州事民有爭訟輒諭以理而釋其怒不忍置于獄寬其征需不使物價騰湧民多德之

贊曰文燧以扞禦鄉井列官省府平寇解難斯有功于世者履以儒學治行卓然亦可謂吾郡之能人矣

明鄭渙傳

鄭渙字仲釋浦江人剛果有爲元季寇興院判謝國璽辟著浦江縣簿以才能稱未幾解職還家以公平制鄉里不使豪強病民有爭訟

則諭以理而與酒和解之子桐姪村

桐字叔成勤敏明察鄉里推之御史劉辰薦于朝累官滁州通判階  
徵事郎奉公廉謹爲同寮所敬州當衝要牒訟繁劇能躬勤治理考  
稱善最後督運木植至潁中風卒于馬上知州陳璉惜之爲銘其墓  
柩字叔鄂仲釋次子命爲弟瀛仲容後仲容早世其配黃氏寡居叔  
鄂與妻許氏奉養惟謹黃氏沒執喪三年及居所生父母喪俱行三  
年禮人以爲難叔鄂受業陳剛貫穿經史尤喜吟詩與諸兄弟觴咏  
怡怡然如游春風中喜怒不移始終如一自號怡怡子以子燧貴封  
承直郎詹事府丞燧今陞奉議大夫大理寺丞以廉能著稱朝署

明鄭湜傳

鄭湜字仲持浦江人魁偉宏度見義必爲洪武中家有誣指寄鈔者  
時罪叵測仲持毅然就逮不以煩諸兄至京長兄仲德相遇爭往就  
獄皇上義而釋之賜仲持冠帶衣服欲任以叅政廷臣對無缺員卽  
命增設叅議以仲持爲福建布政使司左叅議階中順大夫命舉所

知五人皆以爲叅議乘傳到官至卽去貪吏革弊政損民者十餘有  
滯獄積年不決者立剖之稱爲神明暇則鼓琴摘阮以自適時論高  
之姪幹

幹字叔恭仲持親兄漢仲昭之子也仲昭才優識精溫恭寬裕談笑  
處事恒中乎理衆敬服之叔恭受業臨川陳剛剛奇其才堪任風紀  
永樂中薦擢湖廣道監察御史尋被旨宣撫廣東惠政稱著士民懷  
之後以年老勅賜致政錫賚還歸

### 明鄭洪傳

鄭洪字仲纖浦江人應變如轉丸岐陽王時駐兵嚴陵令叅謀軍事  
壬入朝薦除侍禮郎累官內藏庫提點以累死妻石氏以例當配絕  
粒者十日人勸之泣曰吾爲義家婦今夫旣死何以生爲遂縊而死  
上聞嘆曰眞義門婦也

### 明鄭沂傳

鄭沂字仲與浦江人父銖字彥平嘗北遊京師以才受知丞相爲宣

政院照磨兼管勾承發架閣轉松江等處稻田提領所大使乘傳赴官卽易去斗斛之病民者倉有餘糧二千石亦給還種家未幾棄官而歸仲與性通敏洪武丙子朝廷更新庶政選才間右輔翊治化仲與應召赴京特拜禮部尙書階資善大夫仲與自以布衣致位列卿夙夜勤勞盡心報國上念其誠篤嘗嘉獎之已而大行賓天奸臣擅政遂解組還家永樂初元詔起耆舊復拜春官尋以年老賜歸出里未幾皇上北巡詔起還朝輔翊太子旣而駕還仍賜歸老以高壽終

姪機

機字叔慎敏學勤事永樂中以賢良薦召試吏部授文林郎湖廣漢川知縣轉廣東仁化知縣蠻寇爲亂朝廷遣兵捕叔慎召父老用計擒獲渠魁白于主帥俾兵不擾而民安

贊曰柏之諸父兄多以功業著見知名于時畧舉其槩而詳皆見諸墓誌觀者有足徵焉

明劉辰傳



劉辰字伯靖金華人以文行著稱洪武己卯薦擢湖廣道監察御史立朝謇諤持正不阿遷鎮江太守興利除害士民懷之永樂初召修太祖實錄書成超拜江西左叅政聲稱燁然尋免歸旣而朝廷思耆碩召拜北京刑部侍郎俄以年老勅賜致仕邦人榮之

贊曰柏嘗道經鎮江父老言辰治行卓可稱觀其復宗澤祭田而葺其墓斯可知其爲政之先後矣

### 明張子玉傳

張子玉浦江人曾祖夢龍湖州儒學正祖一寧咸以公平服鄉里父鋼字均茂倜儻負氣喜交賢士尤喜戴良天兵下婺州薦授婺州錄事司錄事未幾退歸田里鄉鄰爭訟者折以片言皆懽解而退至于排難解紛不動聲色而理之帖然人稱其能子玉性質純厚而師于戴良所學益充洪武中父以非罪赴京子玉侍行請代詣理俄以恩宥得釋鄉里稱之洪武丁丑詔選閭右任用子玉應召赴京擢拜湖廣布政使司左叅政涖政寬平守職廉謹未幾卒于官次姪孟兼

孟兼勤敏志學以文辭知名洪武初薦入史館預修元史書成授國子學錄累官僉山東按察司事彰善糾惡憲綱肅然陞山西按察副使與布政爭論異端布政銜之中以他事法死京師縉紳惜之所著有白石山房稿

贊曰子玉以代父繫獄而列職大藩斯蓋天之報施善人矣孟兼爭論異端而受謗以死又何物理之有戾乎然孟兼以剛方少容而陷身刑戮豈孔子所謂不得其死然者非歟

### 明王應傳

王應字思正浦江人敦厚周慎佐父士覺以禮齊家以義聚食防範有條訓飭有規羣從允服洪武中薦授廣東布政使司左叅議時盜發南海官軍不能平應率義旅以蜚船爲聲援入其巢穴擒渠魁而殲之餘黨悉平俄以外艱去職服除轉河南左叅議未幾以累卒朝士惜之子溫循禮好學手抄胡翰文請其父鏤板傳世爲縉紳所稱贊曰應能以禮齊家以寬治政平盜靖民民懷其德可謂能人也已

明吳彥珍傳

吳彥珍浦江人。以才行稱。洪武中，由間右舉，擢四川布政使司左布政。寬平簡易，軍民懷之。尋罷歸。永樂初，召復原職。俄以年老，勅賜致仕。子思學，孝行純篤，知名于時。

贊曰：吾邑自本朝以來，由布衣舉任布政者先後六人：趙子良、費斗南、以耆民舉彥珍、黃繼先、方孟升、張拱辰，皆以間右舉，可謂遭際之隆矣。然攷其治彥珍爲有稱焉。

明何士英傳

何士英，東陽人。宋叅政夢然之八世孫。操行純潔。洪武中，由間右舉任平涼府通判。政治稱最。陞本府太守。累官兩淮轉運鹽使。所至以廉能稱。

明潘榮仲傳

潘榮仲，浦江人。洪武中，由間右舉任建昌太守。廉能著政，士民懷之。尋卒于官。

明鄭子祥傳

鄭子祥浦江人義門疎族也恭謹好學嘗爲義門義塾師洪武中薦授口目縣知縣守職廉平畏慎自持或賂以賄毅然却曰吾爲義門族豈使簞簞不飭而取玷吾宗乎君子稱之

贊曰士英爲叅政裔孫而以廉能歷躋臚仕斯其無忝厥祖矣榮伸由閩右舉而潔廉著政子祥以義門疎族清慎奉職介然不移所謂蓬生麻中不扶自直者與

明邵玘傳

邵玘字以先蘭溪人由進士擢監察御史忠言讜論上簡聖衷超拜江西按察司丁內艱服闋遷福建按察使憲綱風紀政聲燁然家有靈芝之祥時人異之

明祝戒傳

祝戒字存禮蘭溪人由監生任刑部主事陞湖廣按察僉事尋超福建按察副使廉能著蹟所至有聲

贊曰蘭邑爲吾郡大邑玘戒俱以文章政事致身顯要同秉憲綱澄  
清柏府著政大藩其有光于吾郡矣

明徐子玉傳

徐子玉字公璧東陽人永樂二年登進士第授寧國府涇縣知縣秩  
滿陞崖州知州應求賢詔又陞鎮蠻知府尋遷知建寧府善政著蹟  
聲稱遠邇其事親孝母俞氏守節教子于玉官崖州時道遠不能迎  
養分俸于本貫支給以養母人多稱之從兄隆字原大由監生擢監  
察御史秩滿陞福建按察僉事其事父仲禮生能盡孝沒能盡哀爲  
鄉間所稱云

贊曰陳陽爲五府之地仕宦赫奕其所由來尙矣于玉事親能孝政  
治有聲則其歷躋台輔又何前賢之不及哉

明黃嗣安傳

黃嗣安字仲行浦江人洪武中以孝廉舉任安東知縣至則除黠吏  
以安其民舉賢才以爲國用俄入覲銓選居天下第七授承直郎賜

以勅書俾陪祀園邱尋卒于官

贊曰嗣安以孝廉舉而能去黜吏舉賢才斯亦善于爲政矣

明洪澤傳

洪澤字宗潤浦江人宋忠宣皓子遵之裔孫以能吏歷事京師嘗以計活人久之授丹陽主簿咸著善政奏減建安民稅邑庶懷之從兄蒞字延輝事母盡孝火延居室赴火抱母而獲免爲縉紳所稱云贊曰相與澤以世姻之契辱過麟溪見相所編文纂以爲當今盛典宜刊印以廣其傳遂持至建安捐俸刊行以成聖朝文物之美斯非卓見遠識見義必爲而能之乎觀其立志則致身顯要詎可量哉

明朱珣傳

朱珣字師全永康人文行稱于士林洪武間舉任新會縣丞累官刑部主事轉松江府通判尋遷判福州府所至以能聲著稱

明盧睿傳

盧睿字員明東陽人祖怡仲謹厚有容洪武中飢民聚黨取其廩粟

縱之不問眾感之睿登永樂辛丑進士授廣東道監察御史以才能稱兄員華永樂初預修大典書成授寧化縣丞

贊曰珣與柏家有媿珣嘗過蒲陽文采風度蔚乎其可觀而睿未獲接識聞其爲人亦彬彬乎學行之充矣是皆故家右族宜其光耀于仕版云

明吳澤傳

吳澤字叔霖東陽人父仲吉守道安素言行中理爲鄉邦所稱讀書教子嚴而有法澤勤敏好學永樂乙未登進士甲科擢兵科庶吉士甲辰陞本科給事中以才能著稱宣德戊申奉旨福建清理軍籍榮膺勅命以本官推榮父母賜以祠祭之費便道焚黃鄉里榮之

贊曰柏聞東陽賢士稱仲吉善于教子而謂澤通敏平恕和柔豈弟溫子儒者之風觀其以表彰斯文爲己任捐俸刊柏所編續文章正宗斯能勇于爲義其孔子所謂君子之儒也哉

金華賢達傳卷八

續金華叢書

明 鄭柏著

儒學

梁劉峻傳

劉峻字孝標隱金華紫微巖講授生徒撰類苑一百二十卷清修寺  
卽其故宅

唐劉昭禹傳

劉昭禹字休明金華人刻苦工詩云有句向夜中得心從天外歸後  
仕湖南爲天策府學士嚴州刺史有詩三百篇

南朝婁幼瑜傳

婁幼瑜字季玉義烏人聚徒教授不應徵辟著禮記裙拾三十卷禮  
記撫遺一卷文集六十六卷

唐駱賓王傳

駱賓王義烏人七歲能賦詩與王勃楊炯盧照隣以文章齊名號爲



四傑賓王初爲道王府屬累遷臨海丞艱鞅不得志棄官去武后時徐敬業起兵署爲府屬爲敬業傳檄天下斥武后罪后讀至一坏之士未乾六尺之孤安在日誰爲之或以賓王對后日宰相安得失此人敬業敗賓王不知何之

贊曰吾婺以儒學起家由六朝至唐知名者僅數人若峻類苑之博昭禹作詩之工幼瑜著述之富賓王號稱四傑皆可謂吾郡之儒宗云

### 宋于房傳

于房浦江人父暲有學工文五季之亂抗志不仕後以房貴贈大理寺丞房爲文精簡中嘉祐四年進士第官至尙書宅田員外郎通判應天府南京留守司兄立璧皆舉進士于鄉諸子世封正封亦舉進士世封能暗記六經三史正封尤以博洽自負每兄弟論辯各歷誦全文一字不遺人號爲雙璧初世封善屬文頃刻數千言自以所向無敵及同正封見歐陽修修不以爲然世封慚修因授以爲文之道

其文于是益進晚乃著易書詩傳正封著春秋三傳是非說有方象者受學正封輯其家三世能文者七人號七星集云

宋朱臨傳

朱臨浦江人從安定胡瑗授春秋學瑗嘗著春秋辨要惟臨得之爲精晚年好唐陸淳學淳之師燁助趙匡嘗會三傳而取舍之淳遂總其說爲纂例辨疑二書臨謂孔子没千有餘年說春秋者皆膠于偏見無有出淳書之右者雖董仲舒猶拘于穀梁不克別白餘可知也臨被薦歷宣德郎守光祿寺丞以著作佐郎致仕後以子貴贈正議大夫著春秋說

贊曰天聖慶歷間浦江之能文章者惟于房父子爲盛優于經學則臨一人而已臨之所傳有淵源惜乎不見其書房之論文有曰陽開陰閣俯仰變化出無入有其妙若神何其言之善也蓋文主于變變而無迹之可尋則神矣學者其識之

宋王固傳

王固義烏人受業胡瑗登皇祐五年進士初名固臚唱之日仁宗賜以今名因字天貺卒官恩陽令

宋王永年傳

王永年固之從孫登進士第累遷中大夫知福州封文安縣開國男食邑三百戶贈正議大夫子鑄孫寧寅曾孫謙鑄通判嘉興府累贈金紫光祿大夫寧提舉廣東常平寅歷知宜連籐柳峽饒江七州謙知隆州凡用蔭入官十餘人

贊曰栢觀東都盛時義烏第進士自固始而從孫永年子孫累世登第歷官至今以儒行相承號爲衣冠望族亦盛矣哉

宋樓圖南傳

樓圖南字鵬舉義烏人由太學生登進士第累官朝議大夫知吉州封祥符縣開國男食邑三百戶贈中奉大夫族孫大年從孫晏子固皆進士

宋楊昂傳

楊昂字漢卿義烏人登進士第終通直郎知分水縣孫忱中曾孫焯  
點樵煥炳

忱中字德天擢國子監丞累遷朝請大夫知蘄州著易原三卷其言  
欲觀八卦生而爲六十四卦講玩先天圖欲觀八卦重而爲六十四  
卦則繫辭說卦之所言康節之極數知來其妙在于加一倍法

焯累官中奉大夫知南雄州贈通議大夫點樵煥炳仕不大顯與焯  
俱以文名于時焯子埴所學尤博自號芥軒以蔭補官累遷奉直大  
夫知肇慶府爵金華縣開國男食邑三百戶

贊曰栢觀南渡後義烏之達士以圖南爲首族屬相繼昂亦以進士  
起家學行名爵著稱累世其見于先達題名者十有三人亦當時吾  
郡之望宗矣

宋錢適傳

錢適字德循浦江人進士甲科調洪州推官累遷殿中侍御史中丞  
豐稷論其回邪不可任風憲不報稷復言必用適則願罷臣乃改提

舉湖北常平崇寧初召爲都官員外郎殿中侍御史劾曾布援元祐  
姦黨擠紹聖忠賢布去遷侍御史闕兩月進中丞乞治元符末大臣  
嘗乞復孟后而廢劉后事由是韓忠彥等皆坐貶遂與殿中侍御史  
石豫言元祐皇后得罪先朝而陛下復于事爲不順于是尙書右僕  
射蔡京等言請如紹聖詔旨后由是復廢適豫又言元符皇后名位  
未正乃册爲崇恩太后蔡京請取青唐遙助成其議會籍元祐黨遁  
以爲多漏畧給事中劉逵駁之左轉戶部侍郎俄遷工部尙書兼侍  
讀踰年以樞密直學士知穎昌府言者疏其罪黜滁州稍復顯謨閣  
待制直學士徙宣州復爲工部尙書舉馮澥自代謂澥趨操端勁忠  
義凜凜言者又疏其罪以待制知秀州中書舍人候綬封還之又奪  
待制久之還故職改述古殿直學士屏居十五年方臘陷婺適逃奔  
蘭溪爲賊所殺

贊曰人物記稱遂記問過人爲文章明白簡切自成一家孫億年字  
白壽以祖蔭入官累遷朝議大夫有詩號雲巢集又述四朝史云瑤

華失位而復也太母實詔之姑有還婦之文母有改子之道播之天下合于至公適在當時孰謂其不知此理耶其意蓋有所徇爾論者以是多譏焉

宋何敏中傳

何敏中字元功浦江人自少學易恐飲酒廢業終其身勿御與梅執禮甚洽每有疑相與論定之郡縣察其賢將以八行及遺逸薦辭敏中素仁厚游太學時同舍生方位卒敏中驚行橐持其喪歸隣州寇起將壓境敏中攜家避山中比隣從者以百數道遇擁刃來者眾相顧泣且死敏中出告其酋酋大呼曰此浦江何公也吾昔爲尉所縛藉公一言而免是嘗有恩于我者不可害卽命兵護出之

宋朱有聞傳

朱有聞字子益浦江人刻苦爲學悉通諸家書作文尙質實視富貴無所屈呂祖謙知其有守而多聞訪之再以書速之止修報謝亦竟不行子羣字穎叔中紹興四年進士第

贊曰敏中令盜感恩庇百人之死其行可見矣有聞不通謝謁豈非有守者乎若二人者其有勵于頽俗也夫

宋倪朴傳

倪朴字文卿浦江人曾祖展以貲雄于鄉初胡則奏免衢婺丁身錢崇寧間欲復算之展持則像謁拜部使者訴其非便復奏免之祖子從多奇謀建炎初山賊作亂縣令問計子從爲之籌畫使其子統民兵爲前導賊皆敗走別部有貪功擒至百人者縣令將斬以徇子從急白令曰此輩豈皆賊哉不如勿殺使自新令悟而止邑境帖然朴豪雋不羈紹熙間草書數千言陳征討大計又以天下山川險阻爲輿地會元志復著鑑轍錄以陳國家禦侮用兵之失時人鮮有知朴者獨陳亮敬焉淳熙中與知縣趙汝鉞有隙鄉人樓益恭遂以豪俠中之徙家筠州曾赦東歸朴于書過目不再覽辨駁甚精論者服之其友吳克巳字復之鶴塘人窮經博古著述甚多

贊曰人物記稱朴以一布衣乃能赤心憂國吐其耿耿雖其書不能

進其視賈廷佐陳亮之書相去豈遠哉

宋鞏豐傳

鞏豐字仲至號栗齋武義人嘗從朱熹學聲實甚著以太學上舍擢高第教授漢陽軍累官知臨安縣改提轄左藏庫奉祠卒豐工詩多至三千餘首有東平集二十七卷

宋王師古傳

王師古字唐卿金華人紹興甲戌進士嘗爲南劍州教授刊龜山遺書守九江建堂于濂溪祠側知崇正學歷仕州縣皆有治蹟除廣東提點刑獄卒有文集及資治通鑑集義八十卷子謙之字吉甫登淳熙甲辰進士益之字行甫淳熙進士仕至大理司直著職源漢官總錄

宋潘宗回傳

潘宗回金華人以儒學起家仕至左朝奉大夫晚得復州未上卒弟宗說仕爲壽昌縣丞姪景珪仕至中散大夫權尙書刑部侍郎兼勅



令所刪修官臨安少尹景憲字叔度由太學登進士第克太平州教  
授致仕改承事郎景愈字叔昌登進士仕至安慶教授景憲子自牧  
字牧之慶元丙辰進士爲福州教授歷官至常山縣令著記纂淵海  
贊曰豐從朱熹問學而擢高第其操行可知師古由進士歷官郡邑  
政治有聲而諸子繼登科甲皆有著述可稱宗同宗說以儒學起家  
列仕州縣而諸子及孫次第進士蜚聲仕籍斯知吾郡儒學之盛矣

宋喻良能傳

喻良能字叔奇義烏人父葆光娶黃氏睦盜起青溪婦翁以白金千  
五百兩屬葆光窖藏之盜平婦翁亦死三子俱幼莫知金所寓葆光  
舉而歸之三子請奉數百兩爲謝葆光雖貧力辭弗受人稱其長者  
黃氏脫簪珥買書延師教其五子皆有成立後以良能貴累贈其父  
大中大夫黃氏令人良能與兄良倚同入太學又同年登進士第初  
補廣德尉三獲強盜應賞格辭不受累遷國子監主簿進忠義傳起  
戰國王蠲止五代孫晟通一百九十人乞頌之武學授之將帥孝宗

嘉嘆顧侍臣日喻良能質實平正御書其名于屏間丁內艱服除以國子博士召兼工部郎官除太常丞兼舊職請外知處州尋奉祠而歸以朝奉大夫義烏縣開國男食邑三百戶致仕鄉人慕其名立石表其地日郎官里所著有諸經講義香山集家歸編忠義傳從子不伐倨演國衡皆進士不伐甲科倨官朝奉郎有蘆隱集  
良倚字伯壽卒官臨海丞有唐論策斷文選譜詩文若干卷弟良弼良弼字季直太學生特科補新喻尉有杉山堂集樂府

宋何恪傳

何恪字茂恭義烏人父桀有才畧睦寇竊發詣軍門獻策主帥楊惟忠用其言以取勝奏補承信郎監恩州酒稅營卒謀爲變密白郡守而往誅其元惡釋其誣誤上功轉承節郎神武後軍統制劉光世辟主管本府機宜文字未踰月歸謂人日使吾二子文行有成勝吾擁使節疏侯封也恪與恢皆感勵而力學及同上春官恪中選恢欣然日是足以報吾父矣遂謝場屋恪藏書至萬卷博覽而工于文初主

永新簿再調徽州錄事參軍未赴詣闕上萬言書進恢復二十策與朝論不合歸治園築亭奉母爲樂俄先母死所著有南湖集從孫器噩器登進士終于廣昌丞善爲古詩噩亦工詩有曲汀集

宋陳炳傳

陳炳字德先義烏人好古文務爲奇語登進士第爲太平縣主簿有易解巖堂雜稿

贊曰龍川陳亮稱烏傷四君子良能于人煦煦有恩義能使人別去三日念之不釋其爲文精深簡雅讀之愈久而意若新良弼遇人無親疎貴賤皆與之盡其情其文蔚茂馳騁蓋包羅衆體而一字不苟讀之亶亶而無厭何恪日空四海獨能降意于一世豪傑而士亦樂親之其文奇壯精緻反覆開闔而卒能自闡其意陳炳一世不足以當其意而人亦不願從之游然其文清新勁麗要不可少噫是非知人之明而探其文之精妙者其言能如是乎

宋唐仲友傳

唐仲友字與政號說齋金華人父堯臣爲侍御史以直言稱仕至龍圖閣朝散大夫仲友博涉羣書登紹興進士第復主宏詞科累官判建康府上萬言書上納其言再轉知台州興利除害政聲燁然俄爲同官高文虎所忌譖于提舉刑獄劾罷主管建寧武夷山冲道觀開席授徒學者雲集至四百餘人復肆力經史以卒其業所著有六經解諸史精義羣書新錄合三百餘卷文集四十卷兄仲温仲義皆紹興進士

贊曰柏觀潛溪集而知仲友被劾之詳然仲友既遭劾黜而得肆力于學著書立說以發其蘊故雖失于彼而能得于此者蓋亦多矣復何憾哉

宋徐無黨傳

徐無黨永康人從歐陽修游修稱其文日進如水湧而山出登皇祐二年進士第仕至郡博士註五代史行于世

宋范浚傳

范浚字茂明蘭溪人家世業儒祖父昆弟皆顯宦獨浚不嗜榮利閉門講學篤志求道學者稱之曰香溪先生有文集朱熹表章其心箴篇從子端字元卿乾淳中在館閣以文翰知名者與潘默成游清介之操以無異云

宋杜汝霖傳

杜汝霖字仁翁蘭溪人從胡瑗學至曾孫旃伯高旃仲高旃季高旃叔高旃幼高人稱金華五高旃其最也皆博學善古文旃登呂祖謙門旃間道朱熹淳熙開熙間旃兩以賢良方正薦未赴端平中入館閣五人皆有詩文行世

宋劉滂傳

劉滂字德霖武義人與梅執禮學于會稽號東梅西劉登大觀進士累官守建昌遇軍變死于難事聞贈朝議大夫官其子右孫從弟嘉成登政和進士累官通判楚州嘉成曾孫渙渙之孫仲實皆登進士仲實任常州觀察推官

宋鞏庭芝傳

鞏庭芝字德秀東平須城人建炎寓居武義遂爲縣人以文學馳聲人稱爲山堂先生登紹興進士第累官太平州錄事參軍隆興中贈大中大夫子湘登進士歷官直龍圖閣知廣州孫豐嶸峻俱登進士曾孫八人俱蔭授郎官

贊曰無黨之文見稱歐陽浚之心箴表章朱子汝霖承胡瑗之學以淑諸孫旁與庭芝累葉登第而學行有足稱焉

金華賢達傳卷八

金華賢達傳卷九

續金華叢書

明 鄭柏著

儒學

宋呂祖謙傳

呂祖謙字伯恭尚書右丞好問之孫也自其祖始居金華祖謙之學本之家庭有中原文獻之傳長從林之奇汪應辰胡憲游又友張栻朱熹講索益精初蔭補入官後舉進士復中博學宏詞科調南內宗教丁內艱居明招山四方之士爭趨之除太學博士尋兼國史編修實錄檢討輸對勉孝宗留意聖學且言恢復大事召試館職嘗讀陸九淵文喜之而未識其人考試禮部得一卷曰此必江西小陸之文也揭示果九淵人服其精鑒後以李燾薦重修徽宗實錄書成進秩面對言治道體統敷陳剴切遷著作郎以末疾請祠歸先是書肆有書曰聖宋文海孝宗命臨安府校正刊行學士周必大言文海去取差謬恐難傳後盡委館職選擇以成一代之書孝宗以命祖謙遂斷



自中興以前崇雅黜浮類爲一百五十卷上之賜名皇朝文鑑詔除直秘閣時方重職名非有功不除中書舍人陳騏駁之孝宗批旨云館閣之職文史爲先祖謙所進採取精詳有益治道故以寵之可卽命辭騏不得已草制尋主管沖祐觀明年除著作郎兼國史院編修官卒年四十五諡曰成祖謙少不急一日誦孔子言躬自厚而薄責于人忽覺平時忿憶渙然冰釋朱熹嘗言學如伯恭方是能變化氣質修讀書記大事記皆未成書考定古周易書說闡範官箴辨志錄歐陽公本末皆行于世晚年會友之地曰麗澤書院在金華城中祖謙旣沒羣人卽而祠之子延年

贊曰祖謙得中原文獻之傳以關洛爲宗師而取友于張栻朱熹故能研究精微深造聖賢之域宏經闡教唱道東州俾婺女之墟號稱文獻之邦其有功于吾郡者多矣而當時淑其緒論者或位登台輔或表忠效節或師表當時澤被生民德沾海宇又何其宏遠也哉吾黨之士幸生斯郡沾其殘膏賸馥其可不知所自云

宋徐僑傳

徐僑字崇甫義烏人從學于呂祖謙門人葉邦淳熙十四年進士調上饒主簿始登朱熹之門熹稱其明白剛直命以毅名齋入爲秘書省正字校書郎兼益王府教授直寶謨閣江東提點刑獄以忤丞相史彌遠劾罷寶慶初葛洪喬行簡代爲請祠迄不受祿紹定初告老得請端平初與諸賢俱被召遷秘書少監太常少卿趨入覲手疏數千言皆感憤剴切帝慰諭之顧見其衣履垢弊愀然謂曰卿可謂清貧僑對曰臣不貧陛下乃貧耳帝曰朕何爲貧僑曰陛下國本未建疆宇日蹙權幸用事將帥非才旱蝗相仍盜賊並起經用無藝帑藏空虛民困于橫歛軍怨于措克羣臣養交而天子孤立國勢阽危而陛下不悟臣不貧陛下乃貧耳又言女謁閹宦表裏用事帝爲之感動改容咨嗟太息明日手詔罷邊帥之尤無狀者申徹羣臣以朋黨爲之戒命有司裁節中外浮費而賜僑金帛甚厚僑固辭不受侍講開陳友愛大義用是復皇子竑爵請從祀周敦頤程灝程頤張載朱

熹以趙汝愚侑食寧宗帝皆如其請金使至僑以無國書宜館之于外如叔向辭鄭故事忤丞相意力丐休致帝諭留甚勤遷工部侍郎辭益堅遂命以內祠侍讀遇事盡言以疾申前請乃以寶謨待制奉祠卒諡文清

贊曰史稱僑之清修苦節惜不至乎大用豈知僑者哉君子之事君惟求夫言之聽而道之得行耳奚較其爵位之崇卑乎僑以一言感悟更革弊政煥然一新至于不受進言之賞固辭侍郎之命亦可觀其去就之正矣又烏可以患得患失之人同日而語哉

### 宋何基傳

何基字子恭金華人父伯慧爲臨川縣丞而黃幹適知其縣伯慧命二子執弟子禮幹告以必有真實心地刻苦工夫而有獲基兢惕受命得聞淵源之懿學成授徒來學者衆嘗謂學者立志貴堅規模貴大克踐服行死而後已讀詩之法須沉潛玩索吟哦諷咏使人感發方謂有功謂以洪範參之大易其言有不約而符者謂讀易者當去

其膠固支離之見以變與占沉潛涵泳得其根源乃可漸觀交象基  
淳固篤實雖嘗奉于熹然就其言發明則精義新意愈出不窮有文  
集三十卷郡守趙汝騰延聘辭不就復薦于朝又率名從官列薦景  
定五年詔舉賢特薦爲婺州學教授力辭咸淳初授史館校勘兼崇  
政殿說書改承務郎主管西岳廟終亦不受卒于家國子祭酒楊文  
仲請于朝諡文定所著大學中庸大傳易啟蒙通書近思錄皆有發  
揮

贊曰基之學得乎紫陽淵源之懿雖師傳有自亦天分之高也而謂  
爲學立志貴堅規模貴大克踐服行死而後已謂讀詩必至感發讀  
易必得其根源斯又知其進學之功矣學者觀之可不勉夫

### 宋王栢傳

王栢字會之金華人大父師愈父翰皆從朱熹呂祖謙遊翰授朝奉  
郎主管建昌軍仙都觀柏少慕諸葛亮爲人自號長嘯年踰三十始  
知家學之原捐去俗學勇于求道與其友汪開之著論語通旨至居

處恭執事敬惕然嘆曰長孺非聖門持敬之道亟更以魯齋往從何  
基游基授以立志居敬之旨且作魯齋箴勉之栢夙興見廟治家嚴  
飭恤孤賑族開之沒爲之歛且葬焉旣而來學者眾其教必先之以  
大學鄉之耆德皆執弟子禮栢之言曰伏羲則河圖以畫八卦文王  
推八卦以合河圖河圖者先天後天之宗祖也河圖是逐位奇偶之  
交後天是統體奇偶之交惟四生數不動以四成數而下上之上耦  
下奇莫匪自然又曰大禹得洛書而列九疇箕子得九疇而傳洪範  
範圍之數不期而暗合洪範者經傳之宗祖乎初一日五行以下六  
十五字爲洪範五皇極以下六十四字爲皇極經此帝王相傳之大  
訓非箕子之言也又曰今詩三百五篇豈盡定于夫子之手削去野  
有死麕黜鄭衛淫奔之詩又作春秋發揮又曰大學致知格物章未  
嘗亡還知止章于聽訟之上謂中庸古有二篇誠明可爲綱不可爲  
目定中庸誠明各十一章其卓識多類此及卒整衣端坐揮婦人勿  
近國子祭酒楊文仲請于朝諡曰文憲所著書皆發明經傳篇目不

一詳見史傳

贊曰聖人之言信乎有益于人矣然能悟之則爲聖爲賢而不知悟者嘗多矣栢讀論語至居處恭執事敬惕然感悟棄其他慕而趨乎聖賢之域勇于求道以至大賢之歸不亦豪傑之士哉而著述之富議論之正開導後學誠有益云

宋傅芷傳

傅芷字升可義烏人博通諸經尤長于詩登第需次弋陽尉諸生爲結廬于龍門山奉而學焉郡守趙汝騰薦于朝以有官不召未到官而卒

宋傅寅傳

傅寅字同叔義烏人博涉羣書窮究根穴訂其僞謬號曰羣書百攷唐仲友見而喜曰吾益友也及聞其升陞分陝之說語門人曰職方輿地盡在同叔胸中矣呂大愚閱其禹貢圖攷日可謂集諸家之大成矣學者因所居尊之曰杏溪先生

以上二人贊缺

宋時瀾傳

時瀾字子瀾蘭溪人祖汝功字德茂父鑑瀾師呂祖謙淳熙辛丑進士累官朝散郎通判台州祖謙輯書說自秦誓泝洛誥未畢而卒瀾補完之見所自爲序有南堂集若干卷季子少章字天彙由鄉貢入太學登寶祐進士第天才絕出博極羣書由麗水縣主簿三轉擢史館檢閱以陵躐劾罷授保寧軍節度掌書記卒所著易詩書論語孟子大義六十餘卷又有論孟詩贅說易卦贊雜文古歌詩數千篇摠名所性集鑄字壽卿瀾之仲父與呂祖謙同登進士爲國學書庫官兄澐字子雲父鎬甌寧尉澐師呂祖謙著尙書周官餘論未成編卒門人私謚曰夷介先生弟洪字叔瞻紹興庚戌進士次弟涇字仲淵由太學中嘉泰進士充浙江幹辦公事

贊曰時氏之學得之呂祖謙而繼登進士雖仕不大顯其著述之富爲時論所推若少章又所謂傑出諸時者矣

宋王象之傳

王象之東陽人著輿地紀勝若干卷

宋馬之純傳

馬之純字師文東陽人登隆興元年進士第初爲嚴州比較務終于  
沅悴受知張栻潛心經籍學者受業嘗以大任期弟子喬行簡卒如  
其言著尙書中庸論語說周禮有隨釋類編春秋左傳有紀事編年  
詩文若干卷號茂陵先生縣爲立思賢坊以尊慕之

宋夏明誠傳

夏明誠字敬仲金華人慶元丙辰進士第三人作八詠樓序

宋潘桴傳

潘桴金華人嘗爲處州教授因蜀人所編朱子語類中論語補其未  
備者爲論語語類號芥軒

宋孫道子傳

孫道子一名德之東陽人自號東白博學善文舉進士仕至秘書監



丞有續大事記及文集

宋葉由庚傳

葉由庚字成父義烏人從徐僑游與何基王栢往來尤密嘗謂古人知行並進聞一善言見一善行未之能行惟恐有聞若乃爲言語文字纏蔽奪其精神必待知至而後行是終無可行之日也人以爲名言稱爲通齋先生

宋王侃傳

王侃字剛仲號栗齋王栢從子受業于何基有詩若干卷

贊曰之純受知張栻遂潛心經學由庚從徐僑能明知行並進之說皆可謂好學之君子若象之之著輿地紀勝明誠之作八詠樓序堦之補語類道子之續大事記俱能著其學術之功而侃以栢之從子又受業何基其學行可知矣

宋施郁傳

施郁字景文義烏人由太學內舍登高第官國子博士從子南一字

與之咸淳龍飛榜第六人官太學博士與石一鰲同時並以文學教授從游者以百數名人科士多出其門

贊曰郁與從子南一俱中魏科歷官博士從游者至數百人斯可知其學行之高矣

宋陳大猷傳

陳大猷東陽人舉進士著書集傳用朱子釋經法呂子讀詩記例采輯羣書附以己意由從仕郎兩浙轉運使準備差遣除六部架閣宋季其說盛行

贊曰大猷以進士舉雖仕不大顯而著述甚富能使人皆行其說斯不爲空言矣

宋方鳳傳

方鳳一名景山字韶父浦江人八世祖資字逢原中嘉祐八年進士第歷官知真州未上卒贈金紫光祿大夫資生楊遠字遐舉以文章名中元祐三年進士以吏部侍郎出爲河北轉運使歿贈大中大夫

鳳嘗以策干陳宜中不能用後得薦授容州文學未幾宋亡肆游金陵東甌間發爲詩歌至三千餘篇日存雅堂集性不喜佛老讀唐傅奕傳壯其爲人摭奕後關異教數十事以擬高適篇曰正人心書子樛亦工于詩

宋吳思齊傳

吳思齊字子善其先居處州大父壻永康陳氏遂爲永康人思齊受學外祖陳亮用父蔭補官攝嘉興丞數以書干宋臣用事者言賈似道母喪不宜賜鹵簿責文及翁顧忌爭不力猶不爭耳又言御史俞浙以論謝堂去職宰相塞言路如朝廷何凡所爲要以直遂其志後與閩人謝翱浦陽方鳳友善相與放游山水間探幽發奇以泄其羈旅感憤之意遇意所不釋或望天末流涕晚得寒疾耳曠自號全歸子遂以名集

贊曰栢居浦陽聞諸長老語及方鳳吳思齊事未嘗不歛衽起敬及觀其所著多忠憤激切危苦悲傷是蓋有諸內必形諸外者矣二人

者豈非古所謂氣節不羣之士也哉

宋黃景昌傳

黃景昌字清遠一字明遠浦江人從方鳳吳思齊謝翱游博通經傳尤篤意書春秋作春秋舉傳蔡氏書傳正誤謂古人論詩主于聲今人論詩主于辭聲則動合律呂可以被之金石管絃辭則文而已矣乃集漢魏以來諸詩各論其時代而甄別之作古詩攷景昌善持論著述甚多自號田居子述田間古調儻九章歌之其事親孝親沒哀泣至終喪

贊曰人物記述浦江立言之士名不著者三人宋元祐間有朱性者師黃山薛大觀得平陽孫復春秋之學著春秋羣疑辨宋季有蔡慶宗光遠者以恩補官至武進丞著春秋集解有陳訥升之者通周易得先儒未發之秘亦著河圖易象本義今皆散佚無存至于景昌所著亦亡其辭可慨也夫

宋許直可傳

許直可字仲堅東陽人入太學登紹興五年進士第充台州學教授遷建康教官以卒官止奉議郎人士惜之爲詩平雅有一唱三嘆之音子中應字成父入太學魁舍選登淳熙進士第官終奉議郎光州定城令其操履純正講授弟子鄉里模範孫彥知字德謙登嘉定四年進士第卒于澧州石門令

### 宋曹冠傳

曹冠字宗臣東陽人入太學秦檜俾諸孫師事之登紹興進士廷唱第二人擢太學博士兼檢正諸房公事檜沒坐累孝宗時得旨再赴殿試又中乾道五年進士乙科累遷知柳州抗章告老轉朝奉大夫賜金紫致仕有經進十論萬言書恢復秘畧時政救弊裕民政要補正忠言帝範十贊雙溪集忠誠堂集子輔以恩補官終承直郎紹興觀察推官孫儼補文林郎終泉州司理叅軍

### 宋趙彥秬傳

趙彥秬字周錫東陽人師事呂祖謙精春秋左氏作發微一百篇以

進上嘉之特循一資旋借和州觀察使金吾衛上將軍充按察副使  
專訖撰虜使問答一編上之轉一官隆興元年登龍飛進士甲科換  
宣義郎累遷眉州通判以卒有詩數百篇名征西隨筆子益夫尤工  
于詩號南坡居士孫時榛以覃思入仕曾孫若堦登寶祐元年進士  
第

宋陳轍傳

陳轍字斯士東陽人從呂祖謙游經術淹貫文章爾雅登淳熙八年  
進士第累官國子博士三轉至著作郎積階朝散郎會臺臣建議將  
改除叅議官遂自祠以歸轍恬靜有守不汲汲于進取有文集二十  
卷子行可沿海制司幹官

宋徐次鐸傳

徐次鐸字文伯一字伯友東陽人登紹熙進士第又試宏詞科仕至  
三衢倅倣周禮作漢官又作唐書傳註補註總三百卷號徐氏唐書  
又以唐書糾謬訛舛作釋糾辨繆十卷嘗尉山陰作復鑑湖議人以

爲確論子商霖仕終遂安宰

宋何淡傳

何淡字履常東陽人嘉定三年車駕臨雍上舍釋褐分教武岡累遷秘書郎以沒淡好學恬靜官多建明所著有武牧錄武林錄子熟以思入仕登端平進士第從父坦字一叟淳熙進士以文章稱于鄉贊曰直可三世進士次鐸兩中科名轍之淹貫經術彥秬之發微春秋淡之恬靜好學皆極一時之選惜仕不稱才僅止郎倅由其操履端方不希倖進所謂守道而安命者已而冠以博聞廣識坐累秦檜爲時論所黜至其恢復秘畧補正忠言及他著述又可觀其學術矣

宋戚如愚傳

戚如愚字少白金華人從呂祖謙游登紹興進士第授柳州教授累遷國子博士時相欲用爲諫官諷使費啓確然不屑出知袁州政蹟大著甫受代而卒門人私謚曰貞白先生

宋邵困傳

邵困字萬宗蘭溪人淳熙八年登第授柳州教授改潭州朱熹方師  
湖南薦其學行晚歲由楚州奉祠歸家名其堂曰今是著禮記解讀  
易管見今是堂藁

宋章如愚傳

章如愚字俊卿號山堂金華人慶元中登第仕至朝奉郎國子博士  
所著有出堂考索

宋楊興立傳

楊興立字子權蘭溪人歷官至奉議郎知遂昌縣嘗游朱熹之門學  
者多宗之輯朱子語畧二十卷

宋應鏞傳

應鏞字子和蘭溪人登博學宏辭科官至太常寺簿開州知府有書  
約義禮記纂義

宋張森傳

張森字餘之浦江人以明經補太學生授潭州儒學教授後解官歸



所著有靜軒詩集子恕慶元儒學教授

贊曰少白受學呂祖謙而著于政蹟森以明經而父子典教困鏞與立俊卿皆有著述以發其蘊足以表見于世云

金華賢達傳卷九

金華賢達傳卷十

續金華叢書

明 鄭栢著

儒學

元金履祥傳

金履祥字吉甫蘭溪人從曾祖景文以孝行著稱名聞于朝爲改所居鄉曰純孝鄉履祥博涉羣書師事王柏後登何基之門柏告以先儒之言居敬以持其志立志以定其本志立乎事物之表敬行乎事物之內此爲學之大方也基又告以理欲之分別當自今始自是造詣益邃時宋之國事已不可爲襄樊之師日急因進牽制擣虛之策莫能聽用德祐初以廸功郎史館編校起之辭弗就屏居金華山中廸導後學諄切無倦而尤篤于分義故人子坐事母子分配爲隸履祥傾貲營購卒贖以還基柏之喪率同門士以義制服而明師弟子之禮嘗謂司馬光資治通鑑劉恕爲外紀以記前事不本于經而信百家之說是非繆于聖人乃著通鑑前編二十卷授門人許謙日二

帝三王之道其微言懿行宜後王所當法戰國申商之術其苛法亂政亦後王所當戒則是編不可以不著也他所著四書疏義考證又合二十卷所居仁山學者稱爲仁山先生元統初國子博士吳師道移書學官祠履祥于學至正中諡文安

贊闕

### 元許謙傳

許謙字益之金華人父觥登淳祐七年進士第謙生數歲而孤始能言世母陶氏口授孝經論語入耳輒不忘稍長受業金履祥之門履祥語之日士之爲學若五味之在和醯醬所加則酸鹹頓異子來見我已三日而猶夫人也豈吾之學無以感發子耶謙聞之惕然居數年盡得其所傳之奧讀四書有叢說二十卷謂學者口學以聖人爲準的必得聖人之心而後可以學聖賢之心具于朱子四書顧其辭約意廣讀者焉可以易心求之乎讀詩集傳有名物鈔八卷以補先儒之未備讀書集傳有叢說六卷觀史有治忽幾微文有自省編他如九流百家老釋之書亦洞究其蘊所爲詩文非扶翼經義綱維世

教未嘗輕筆之於書隱居東陽入華山學者翕然從之吳越荆揚幽冀齊魯不憚遐遠皆及門受業著錄者千餘人隨其才分討論講貫嘗曰已有知使人亦知之豈不快哉嘗以白雲山人自號學者稱爲白雲先生朝廷賜諡文懿行省請于朝建四賢祠與何基王柏金履祥同列于學宮長子元字存仁以文學知名於時洪武初應召爲東宮官遷國子博士未幾超拜祭酒惜爲眾所嫉竟以罪歿次子亨字存禮洪武初薦授北平府教授罷歸授徒從游者眾刻意工詩有陶韋思致日樗散集以徐臯誣累而死君子哀之

贊曰吾郡自何基王柏履祥傳朱熹之緒當時猶未大顯至謙其道益著故學者推原統緒謂謙爲熹之世嫡云

### 元胡長孺傳

胡長孺字汲仲永康人曾祖棗欽州司法叅軍脫畧豪雋輕貲急施人以鄭莊稱之祖嚴起嘉定甲戌進士知福州閩縣事尋遷江西幕府平贛州之難全活數十萬人父居仁淳祐丁未進士知台州軍州

事文辭政事有稱于時長孺性聰敏九經諸史下逮百氏靡不通貫咸淳中詮試第一授迪功郎監重慶府酒務俄兼湖廣軍馬錢糧所僉廳與高彭等號南中入士後轉福寧州倅會宋亡歸隱至元中應求賢詔擢集賢修撰再轉建昌攝錄事程文海方貴顯其外門侵官道長孺命撤之至大元年轉台州寧海縣主簿尋遷兩浙都轉運鹽使司長山鹽場司丞謝病隱杭之虎林山晚得喘疾正衣冠坐逝所著書有五丘編南昌集顏樂齋藁從兄之綱之純皆以文學馳名之綱字仍仲嘗被薦書其聲音字畫之說自言獨造其妙之純字穆仲咸淳進士文尤明潔人稱爲三胡云

贊曰史稱長孺師余學古上承朱熹之學淵源既正涵養自得故其爲人光明宏偉專務明本心之學以誘引後學爲辭章有精魄而發爲功業其後鄉閭取士屢司文衡貴實賤華文風爲之一變而其祖父皆以文名何胡氏之多賢也哉

元柳貫傳

柳貫字道傳浦江人父金字時聲擢咸淳三年右科進士第爲高郵令宋季城寶山民倡亂火金所居邑令欲捕斬之金白令戮其渠餘悉縱不問眾感金造室廬還之貫自幼好學六經百氏異教外書靡所不通受經于金履祥必欲見諸躬行學文于方鳳吳思齊爲文沈鬱春容涵肆演迤用察舉爲江山儒學教諭累遷國子博士轉太常博士柄國大臣欲以其祖配食孔子廟眾莫敢忤貫毅然却之有神降于洛長史上言乞加封號貫言神奸鼓民宜下所司禁之禮部如其言泰定三年提舉江西等處儒學興學延師士風大振至正元年召爲翰林待制兼國史院編修官到官僅七閱月以疾卒所著有文集四十卷雜著書文一十五卷云

贊曰人物記云貫局度凝定燕居默坐端嚴若神卽之如入春風中久與之處未嘗見其疾言遽色生平以獎進人材爲已任故瞻其德容莫不氣奪而意消斯所謂得夫性理之學而見諸躬行者歟

元吳師道傳

吳師道字正傳蘭溪人博涉羣書弱冠讀西山遺書翻然有志于爲  
已之學嘗以持敬致知之說質于許謙謙復之以理一分殊之旨由  
是心志益廣造履益深登至治元年進士第授高郵縣丞調寧國路  
錄事會歲大旱師道勸閭右出粟賑之又言于部使者轉聞于朝賑  
以粟鈔由是存活者三萬餘人遷池州建德縣令豪民侵佔學田師  
道按其圖籍悉令歸學建德非茶區民苦茶稅師道白于上減之民  
困以甦臺省重臣薦于朝召爲國子助教陞博士丁內艱歸以奉議  
大夫禮部郎中致仕所著有易詩書雜說春秋胡傳附辨戰國策校  
註敬鄉前後錄及文集二十卷藏于家

贊曰宋太史景濂稱吳師道得許氏理一分殊之旨故其治本于道  
施其緒餘于郡邑僚屬足濟生民使假之高位而獲大行被其潤澤  
者夫豈少哉若師道者可謂能行其所學矣

元張樞傳

張樞字子長金華人幼聰慧外家潘氏蓄書數萬卷樞取而讀之過

目輒不忘有扣之者隨事以對歷歷如指諸掌其爲文務推明經史以扶翼道教尤長于敘事嘗取三國時事撰漢本紀列傳以魏吳載記爲續後漢書七十三卷臨川危素稱其立義精密可備勸講朝廷取其書置宣文閣至正初右丞相脫脫監修遼金宋三史辟樞本府長史力辭不拜復以翰林修撰儒林郎同知制誥兼國史院編修官召樞復避不就使者強之行至杭州固辭而歸著春秋三傳歸一義三十卷刊定三國志六十五卷做帚編若干卷

贊曰黃潛撰樞墓表序其家世云樞曾祖日新仕宋承節郎祖友諒迪功郎父觀光元初薦授婺州路儒學教授階將仕郎改調紹興路平準行用庫大使以母老不赴遂家食弗仕號屏岩先生樞之學皆受教于其父云

### 元胡助傳

胡助字履信一字古愚東陽人曾祖居仁從呂祖謙學祖中行隱居行義鄉稱善士父祐之宋鄉貢進士用薦者授迪功郎辟史館實錄



院主管文字以助貴贈承事節秘書監秘書郎助刻志爲學悉究經史百氏大旨年踰三十郡舉茂才行中書授建康路儒學錄兼大學齋訓導吳徵過金陵見助詩文大加稱賞由是名振一時累遷温州路儒學教授用薦改翰林國史院編修官至順初從虞集分院清暑上京再轉國史編修在京二十餘年所著有純白齋稿三十卷自爲傳贊日助承家傳呂祖謙之學卒成名儒觀其自傳亦有勵于後學云

元黃潛傳

黃潛字晉卿義烏人母夢大星墜于懷乃有娠歷二十四月始生幼俊異明經著文中延祐二年進士第授台州寧海丞累遷國子博士改江浙等處儒學提舉上納祿侍親之請以秘書少監致仕未幾召除翰林直學士知制誥同修國史尋兼經筵官陞侍講學士仍兼前職累階中奉大夫上章求歸不俟報而行帝聞之遣使者追還京師復爲前官久之得謝而歸七年卒贈中奉大夫江西等處行中書省叅知政事護軍追封江夏郡公諡文獻所著書有文集三十卷筆記

贊曰諳天姿介特在州縣惟以清白爲治在朝廷不登權勢之門君子稱其清風高節博極羣書而約之至精剖析疑難多先儒所未發文辭布置嚴謹援據精切俯仰雍容不大聲色學者尊師之

元吳萊傳

吳萊字立夫直方之子也天資絕人七歲能屬文凡書過目輒成誦嘗往族父家日易漢書一帙以去族父迫扣之朗然而誦不遺一字三易他編皆如之眾驚以爲神延祐七年以春秋舉上禮部不利退居著書授徒有文集六十卷雜著書共一百七十卷嘗以御史薦調長蘂書院山長未上卒

贊曰萊嘗主相家示諸父作文之法有篇聯欲其脈絡貫通有段聯欲其奇偶迭生有句聯欲其長短合節有字聯欲其賓主對待作賦有音法欲其倡和閤闢有韻法欲其清濁諧協有辭法欲其呼吸相應有章法欲其布置謹嚴要皆不越生承還而已然字有不齊體亦不一隨其類而附之不使玉瓚與瓦缶並陳斯爲得之此又在乎三

者之外而非精擇不能到也又云作文如用兵法有正有奇正是法度要部位分明奇是不爲法度所縛舉目之間千變萬化坐作進退擊刺一時俱起及其欲止什伍各還其隊元不曾亂噫有志爲學者于是求之其有益已

元陳樵傳

陳樵字君采東陽人祖嘉仕元階登仕郎父取青國學進士從石一鰲與聞考亭之學樵幼學于家庭受經于李直方于書無不讀寤寐羣經思一洗支離穿鑿之陋爲文務出警策不蹈襲古人遣轍嘗言爲文舍六籍弗講而事文辭綺語何哉所著文有鹿皮子集飛霞觀藁及他著書合數百卷性至孝父病風孿晝夜扶持歲久益勤後患痰疾氣弱不能吐樵截竹爲筒時吸而出之母歿歲久見其遺衣輒奉之而泣生平未嘗言利苟非其義千駟萬鍾弗爲動家雖素饒于貲痛懲膏粱之習惡衣菲食以終其身遇歲歉竭粟賑閭里自取來年以續其食年八十六儻然而逝

贊曰宋太史銘樵墓文云樵以超絕之資曠視千古若一旦暮期以孔子爲師而折衷羣言之是非可謂特立獨行而無畏懼者也非人豪其能之乎考其言行表裏不違君子人哉

元陳堯道傳

陳堯道字景傳義烏人父希聲以文學爲後進師堯道好學不羈浮游物表以能詩知名弟舜道朝出耕夜歸讀古人書薄已而厚物縉紳稱之謂可比古之獨行君子云

贊曰黃潛跋堯道遺文謂其依隱玩世而寓意于文辭至于死生之際處之裕如其有合于聖賢之學而出乎性命之正者嗚呼堯道斯可以爲不朽矣

元王炎澤傳

王炎澤字威仲義烏人嘗從徐僑門人傳考亭之學治舉子業宋亡無意仕進益探聖賢微旨講道授徒久之部使者薦爲東陽常山兩縣教諭遷石峽書院山長所至以善教稱已而棄官歸隱于家學者

尊爲南稜先生炎澤待人一本于誠言論磊落無所隱蔽莫不敬服  
講說務推明大義不事支離穿鑿爲文簡質而主于理詩極渾厚而  
間出奇語不以靡麗爲工有南稜藁二十卷二子良玉常山教諭良  
珉義烏訓導

元葉謹翁傳

葉謹翁字審言金華人曾祖邾受業呂祖謙仕宋爲大冶縣主簿以  
其學授徐僑父霖以家學教授鄉里仕元卒官將仕佐郎蘭溪儒學  
教授謹翁于書無不讀得家傳之緒卓然自立一時諸老儒皆樂與  
爲友由教官累遷婺州路司獄階將仕郎以老請謝事授承務郎温  
州路同知瑞安州事致仕命下以疾不起謹翁事親孝治家有法所  
居齋曰四勿自號曲全詩文和易平實有四勿齋藁曲全集

元石一鰲傳

石一鰲字晉卿義烏人宋景定甲子鄉貢進士少從王世傑得徐僑  
之端緒蘊奧學茂而聲遠從學數百人多取高第晚年覃思千易著

互言摠論十卷

贊日炎澤謹翁一鰲俱承徐僑傳朱子之學或仕或隱名著鄉郡黃潛親淑三家餘論而以道德文章振耀當時所謂青出于藍而青于藍者而炎澤之孫禕承潛之學名亞于師而禕之子紳紳之子稔引而勿替君子之德亦遠乎哉

元劉應龜傳

劉應龜字元益義烏人落落多大志宋咸淳間游太學馬丞相高其材將妻以女應龜不可由是名稱籍甚久之當以優陞解褐德祐失國退隱南山之南人稱爲山南先生部使者强起主教鄉邑尋以疾卒所著有夢稿痴稿雨留稿

贊日黃潛述應龜學本經濟而以簡易制行讀書務識義趣爲文雄肆俊拔一出于已不趨世好而世亦莫之有好焉

元聞人夢吉傳

聞人夢吉字應之金華人父詵老號桂山翁從王柏受經以授夢吉

父子自爲師友夢吉手抄七經傳疏深究義理閉戶十年悉通奧旨  
學者爭趨之泰定中取鄉貢用薦者爲校官累官泉州教授至正戊  
戌調慶元總管府知事

贊曰王禕撰夢吉墓文稱其立誠以致乎本推善以及乎人表裡融  
通終始純一所謂有德之君子聞者無異論云

元戚仲咸傳

戚仲咸永康人高祖如璠與從兄如圭如玉並受業呂祖謙皆舉進  
士如璠歷官朝奉郎知袁州軍州事曾祖宋祥以蔭補官從政郎廣  
德軍司法叅軍祖紹隱居養親人稱爲貞孝先生父象祖信州道一  
書院山長仲咸從許謙問道潛心性理之說旁通諸子百氏主教呂  
氏師法嚴謹學者敬憚之扁其書室曰朝陽人尊之爲朝陽先生所  
著有春秋纂例等書

贊曰仲咸承家學之傳而進之以許謙考亭之緒研究覃思心融神  
會以淑諸人以行于家可謂好學之君子而能世其家者矣豈必傳

王裏組而後可稱哉

元朱震亨傳

朱震亨字彥修義烏人豪邁俠負聞許謙承考亨之緒卽摠衣至門執弟子禮謙爲開明聖賢大旨震亨心領神悟抑其疎豪歸于粹美而欲見之實踐嘗應試秋闈不利喟然嘆曰修齊政治皆一理耳苟能推一家之政以逮鄉閭寧非仕乎乃建祠奉祭講行朱子家禮屏釋老之誕罷瀆神之祀持公平以服衆心排紛難以安閭里人多德之俄母病延醫因自悟曰人子而不知醫或委之庸夫寧無失乎于是參究醫學博求名師得羅知悌之傳治症多獲奇効蓋其理明識精所學必過乎人嘗著宋論格致餘論風水問答他如醫家發明甚多學者因其所居稱丹溪先生國朝有戴原禮周觀道

戴原禮浦江人精究震亨醫學之旨名聞于朝召除太醫院御醫治症多取奇効寵遇殊渥尋陞院使以年老致仕

周觀道字景暹金華人醫學與原禮伯仲間而事母盡孝人稱爲全



孝先生永樂初以醫學薦授魯府良醫正王聞其孝行待以殊禮書江南孝義家賜之人以爲榮

贊曰震亨聞許謙之言超然領悟棄任俠之習趨聖賢之徒不亦豪傑之士哉觀其齊家以禮鄉黨敬服屏斥道釋罷黜淫詞又豈非見諸實踐者與然醫學蓋其餘事耳而因親以及人又何其博施已乎

### 元鄭濤傳

鄭濤字仲舒浦江人父鑑字景明性夷澹吟咏終日忘倦有薦爲江山儒學教諭不赴以仲舒貴贈奉直大夫禮部郎中詩文有正齋集仲舒受業柳貫吳萊以文翰知名用薦者爲經筵檢討每進講天子爲之首肯權參贊官三轉陞太常博士階奉議大夫論張士誠不當賜諡時宰怒被黜退居撰著有葯房集若干卷子枋

枋字叔車爲詞章運筆立就父宦冀北以國破存亡莫測叔車艱往省道金陵艤舟江滸時父適至患病頗重見子喜甚其病隨愈縉紳稱其孝感爲詩美之

元鄭泳傳

鄭泳字仲潛浦江人父敏字彥貞喜施與每躬攜簞食分餉餓殍以仲潛貴封江浙行省左右司都事仲潛受業宋太史以文章知名從兄仲幾游燕京丞相脫脫延教胄子叅太傅府掾史從征高郵平六合轉承務郎温州路總管府經歷決獄平反爲多後棄官養親所著有半軒集家儀等書

贊曰伯父仲舒仲潛天分過人而師傅有自其文章德業垂諸簡冊稱諸縉紳斯可傳于永久矣後學之士其有足徵焉

元呂溥傳

呂溥字公甫永康人從許謙學講究經史悉領其要爲文馳騁雄暢詩動蕩激烈冷家以禮冠婚喪祭一遵朱子所著有大學疑問史論竹溪詩文若干卷弟洙

洙字宗魯師事許謙執經問難多先儒所未發同門之士服其精敏方肆力爲文俄以疾卒所著有太極圖說大學辯疑

贊曰溥洙俱師許謙之學施于家而見諸論者朱太史又銘其墓而表章之斯足爲不朽矣

元張衍傳

張衍字朝佐金華人延祐間爲湖學正以正道開示學者爲士林所推自號願齋後以慶元路儒學教授致仕子主善承家學至元間爲衢州路儒學教授號木齋

元于石傳

于石字介翁蘭溪人從王定菴游接聞考亭之緒爲文確有根據後一意爲詩豪健奇崛有詩七卷

元陳澡傳

陳澡字仲飭永康人經明行修又辭典雅有華溪賦見縣志

元胡仲勉傳

胡仲勉永康人淹貫經傳學者尊之所著有石屏集

元趙良恭傳

趙良恭字敬德蘭溪人受業吳師道建聚星樓延接名士親炙言論  
所學日進宋太史爲序其文傳稱縉紳云

元童良仲傳

童良仲蘭溪人善集虞世南書由進士授通州同知調河間路治中  
元亡退歸田里

元陳公舉傳

陳公舉字正臣浦江人善屬文與兄公觀日與方鳳吳思齊爲文字  
交至元末任本縣儒學教諭累遷江浙儒學副提舉與趙孟頫爲同  
僚用薦者應奉翰林文字甫兩月卒

公觀郡邑志  
俱作公觀

公觀月泉書院山長公舉子昌翁亦能文本縣儒學教諭

贊曰張衍父子教授一州石澤仲勉良恭隱約田里公舉父子兄弟  
亦僅止薄官未遂顯達良仲雖獲佐職州郡遭時多艱而國事去矣  
亦命矣夫

金華賢達傳卷十

金華賢達傳卷十一

續金華叢書

明 鄭柏著

儒學

明葉儀傳

葉儀字景翰金華人受業於許謙謙語之曰學者必以五性人倫爲本以開明心術變化氣質爲先以爲己爲立心之要以分別義利爲處事之制儀朝夕惕厲研究奧旨已而授徒講學士爭赴之謂弟子曰聖賢言行具於六經四書其微辭奧義近世先儒之說備矣學者由其言以求其心不可堅執己意而妄有是非涵泳從容久自得之王師下金華召儀爲諮議以老疾辭隱居養親所著書曰南陽雜藁及他著述

贊曰吳沈撰儀墓文稱其理明識精一介不苟安貧樂道死而不變誠哉是言已所謂有諸內必形諸外者其儀之謂乎

明范祖幹傳

范祖幹字景先金華人少從許謙受學悉能得其旨趣謙嘗語人曰祖幹真有志之士吾之學得其傳矣祖幹以誠意爲主而嚴之以慎獨持守之功誘引學者拳拳真切惟恐其不入於善嘗有薦爲西湖書院山長領職未逾月以養親辭歸孝行甚篤郡守嘉之表其所居之地爲立純孝坊學者因稱曰純學先生所著詩文及他著述合若干卷

贊曰祖幹誠所謂質行之君子也已造履真誠孝行純篤深有得於慎獨持守之功者觀其所著述亦有德之言夫

### 明宋濂傳

宋濂字景濂世居金華之潛溪至景濂始遷浦江之青蘿山祖德政贈太常少卿父文昭贈禮部尙書妣陳氏贈淑人娠七月而生少讀書日記二千餘言嘗從聞人夢吉受春秋繼從柳貫黃潛吳萊學古文辭年二十五明道著書義門鄭氏之東明山名震朝野元至正中

有薦爲翰林編修辭不赴國朝定鼎金陵遣使奉書幣聘爲江南等

處儒學提舉召授皇太子經筵起居注摠修元史陞翰林學士議封  
功臣勲爵遷國子司業三轉爲翰林侍講學士摠修大明日曆拜翰  
林學士承旨嘉議大夫知制誥兼修國史兼太子贊善大夫寵遇隆  
渥啓沃弘多旣而念其開國文臣之首侍從十有九年制度典章燦  
然大備功爲不少詔以年老致政還家官其次子璉爲中書舍人長  
孫愼爲儀禮司序班推榮二代家居三年以愼坐法舉家謫茂州至  
夔門得疾不食者三旬書觀化帖端坐而逝時洪武辛酉年七十有  
二景濂博極羣書孜孜聖學道德文章師表當世敷昭皇猷贊翊治  
化名遍寰宇文傳外夷而循循然謙抑下士接引後進所著有潛溪  
集翰苑集芝園集羅山集龍門子浦陽人物記合一百四十餘卷子  
璉字仲珩以書法擅名當世朝野稱之

贊曰柏嘗受經羅山親炙言論所益多矣匪惟言論而又示之文辭  
何其幸與故觀其文原則知爲文必在養氣而以六籍爲本孟子爲  
宗次之韓子歐陽子噫世之論文無以加於是矣至其自題畫像則



云吾心與天地同大吾身與聖賢同貴奈之何墮於曲學局乎文藝  
亡其眞實之歸溺此浮華之麗又云用致知爲進學之方藉持敬爲  
涵養之地由是觀之其自期待爲何如哉舍是而求其所學於文宇  
之間亦未矣

明胡翰傳

胡翰字仲申金華人曾祖漢學行聞於鄉號南崗處士父英仕元爲  
太平路總管府照磨蒞政有蹟翰幼聰睿甫七歲拾道中遺鏹候遺  
者至而還之初受業於吳師道繼學文於吳萊執經於許謙國朝初  
以賢才起翰赴京會有以金華民藉田出兵者翰爲言民懦不習軍旅  
詔罷之授衢州教授俄奉旨纂修元史書成辭歸卜居長山之陽學  
者稱爲長山先生所著有春秋集義胡仲子集

贊曰吳沉誌翰墓文稱其稟高明卓絕之資爲精敏宏博之學得於  
心而證於人稽於今而質於古爲文簡潔清峻然寡於應酬慎於許  
可故得其文者或鮮信哉言歟

明戴良傳

戴良字叔能浦江人師事柳貫以文章知名元季之間嘗出爲世用遭時多故泛舟江海晦迹四明山中以詩文自寓久之爲怨家舉黜憂憤而卒所著有春秋經傳攷九靈集

贊曰良博學工文而有志事功然進非其所以至浮沉江湖隱約潛晦奈何畏影而行日中危困以死君子舉措可不慎與

明吳沉傳

吳沉字濬仲蘭溪人師道之子以家學自振文名於時洪武中朝廷登進老儒特召爲翰林待制未幾陞文華殿大學士遂以文章擅名朝野久之因事忤旨法死於獄

明童冀傳

童冀字中州金華人文詞與沈齊名洪武初用薦者司訓金華尋除湖州教授遷北平府教授俄坐罪而卒

贊曰吳沉老成宿學遭際於碩儒淪沒之時秉筆詞垣擅名朝野可

謂儒臣之榮矣俄而以罪見誅童冀德豐學富僅得教授州郡未及有爲而陷身於法何斯文之不幸也夫

### 明朱廉傳

朱廉字伯清義烏人曾祖初從徐僑上承朱熹之緒精究理學著太極演說經世補遺祖叔麟承家傳之懿見之爲政歷官同知黃岩淳梁二州事以朝列大夫婺州路總管府治中致仕號遯山父同字性與幼承家學復從許謙講授研究奧旨嘗應辟爲兩淮屯府幕屬未數月解職歸隱以所居曰裕軒遂以爲號伯清少讀父書刻苦厲志淹貫經傳悉領要義旣而學文於黃潛遂以文章知名國初應召纂修元史聖朝日厯擢授翰林國史院編修官授經楚府遂陞長史久之兩耳病聵遂致仕而歸窮經講誦探研聖學嘗取朱熹語類摘其精義名曰理學纂言其爲文謹嚴精密有文集一十七卷子棟字子建強記過人亦以文章知名永樂初薦授國子助教以疾卒於官緡紳惜之

贊曰：柏嘗從伯清問學，由本及末，明白詳盡，使人心開目朗，義理昭然。而其薰陶涵育，如春風和氣之襲人，非夫德充學粹者，其能然乎？而宋太史序其理學纂言，謂能繼朱熹之志，稱爲孝子，噫，是非伯清學之充備，其何以當之哉？

明蘇伯衡傳

蘇伯衡字平仲，金華人。高祖熹顯，謨閣待制，知撫州。曾祖圭，兩淮運幹。祖鎮，淮安縣主簿。父夔，試吏。福安憲府歷授蕭山縣尹，發常平以賑民粟，擒賊首，以平處寇，尋除行省左右司都事，不赴，隱居讀書，以粟齋自號。伯衡資敏絕倫，過目成誦，少習舉業，中歲肆力古文。國初召爲國子學錄，纂修元史，陞國史院編修，以曠辭歸。久之復被召授處州教授，以表箋忤旨而卒。有文集十五卷。

贊曰：宋太史序伯衡文，謂其精博而不粗澁，敷腴而不苛縟，旨哉論矣。然伯衡以絕倫之姿，棄科場之業，刻意古文，頡頏諸老儒，間自成一家言，可謂能紹少公之學矣。惜乎不大有爲，而身罹刑戮，君子蓋

深悲之

明楊芾傳

楊芾字仲彰其先居義烏父德潤始遷東陽芾力學穎悟從陳樵游文辭典雅自號鶴岩先生所著有百一等藁

明金信傳

金信字仲孚金華人穎悟工詩從楊維禎游往來吳越間詩聲遂著部使者以茂才舉不應歸隱金華之優游洞以詩自怡學者稱爲慢吟先生有春草軒集傳世子聲亦工於詩從叔鉉字原昇亦以能詩稱

明李曄傳

李曄字宗表其先汴人洪武初薦授國子助教罷歸假館永康因而附籍長於歌詩有草閣集行於世

贊曰柏過東陽求芾遺稿無從可徵爲之咨嗟嘆息噫世之爲文其散亡磨滅者豈獨芾哉信曄所爲詩甚多其幸存者惟春草軒集草

閣集耳餘亦無傳焉

明何壽朋傳

何壽朋字德齡金華人受業於葉儀窮理守道未嘗妄干於人士論高之以歸全自號隱居教授洪武初舉孝廉以二親俱老辭父沒以所居宅易地以葬焉

明汪與立傳

汪與立字斯道金華人受業於范祖幹與壽朋德行相侔而文學稍優識論亦差勝嘗謂學者當視古人爲不足無視今人爲有餘人以爲名言洪武中嘗爲本府儒學訓導

明汪仲壽傳

汪仲壽字仲山金華人善記覽經史百家靡不窮究尤耽性理之說號靜齋所著有靜齋稿

明張端臣傳

張端臣字正卿浦江人治書易禮二經洪武初薦授本縣教諭從子

述祖應賢良舉洪武中除保定府易州知州

明滕浩傳

滕浩字至剛金華人洪武中以詩經舉爲郡學訓導義烏王紳薦之  
蜀府召爲校文賜詩以還永樂初以年老致仕隱玉壺山因以自號  
紳序其詩有春空層雲秋漢飛隼之稱

明汪雨傳

汪雨字潤之金華人從葉儀游家居講授行義著稱守令敬禮之歌  
詩俊雅有集若干卷

明宗誠傳

宗誠字仲實義烏人受業許謙經明學邃家居授徒所著有孝友通  
紀及詩文子思睿以詩名任本縣儒學教諭

明何傳傳

何傳字宗文義烏人以文辭名洪武中以明經授福建莆田縣知縣  
宦途以清儉自居所著有松山集

明馮翊傳

馮翊字原輔義烏人受業許謙洪武中以明經薦除臨江府新塗知縣所著有崑山片玉集

明馮埏傳

馮埏字伯茂義烏人好學清介以耆民召授江西鉛山縣丞所著有四松軒稿從弟仲庸所著詩文有梅溪漁隱集子鉅字大綱詞翰有稱登永樂鄉貢進士陞太學尋以目疾辭歸

明邢沂傳

邢沂字師魯金華人從范祖幹議析理學詞翰知名洪武初應召赴京以足疾辭歸隱居教授其地有鶴虎兩崖號雙崖處士有詩稿若干卷子旭字景陽永樂初登進士第宰宿松善政著稱陞工部員外郎宣德初超授河南左參政

明呂肅傳

呂肅字伯剛金華人清修志學受經於葉儀研究旨趣隱居栗山喜



爲歌詩大篇短韻震蕩耳目有栗山稿傳於世

贊曰吾郡性理之學由何王金許承考亭之傳遞相授受以啟來學後進之士能深探其旨奧者葉范是已繼其緒者惟壽朋與立其人焉仲壽之博涉經史端臣之兼治三經浩雨誠傳翊墳沂肅又皆見乎著述以發其蘊信乎吾郡之不乏賢矣

明俞慶傳

俞慶字大有義烏人好學有文從黃潛受業又與王禕友善名稱縉紳嘗薦爲義烏訓導久之其家任造版籍吏以遲緩上聞用例遷謫而卒所著有養素藁八卷子恂

恂字子嚴篤學工文從游宋太史嘗用薦爲金華府儒學訓導隨父坐謫相繼而沒君子哀之所著有尙志齋稿一十卷

贊曰俞慶師友名儒知名於時而子恂學文於宋太史相與之琢磨論議所謂益者之友不幸父子謫死遠方嗚呼悲哉

明呂文煢傳

府志作呂煢

呂文煒字慎明永康人父卓字子敬博覽經史教子攻書煒承家學復從朱長史游攻古文辭洪武中吳沈薦於朝歷官周府左長史尋以府僚被罪連坐已而得釋改刑部郎中未幾因事忤旨遂卒於獄縉紳哀之所著有雙泉文集若干卷

贊曰文煒受學朱長史而膺吳沈之薦列職大夫斯亦遭際矣已而連被譴宥而復坐卒死於法又何其不幸也夫

### 明鄭濟傳

鄭濟字仲辯浦江人受學於宋太史爲詩文多出新意所著隨燬不欲留稿書法得晉唐諸體洪武癸酉高廟以義門能循禮法遣使至家年三十者應召赴京凡二十四人問才德孰優眾以濟對授左春坊左庶子階奉議大夫日侍左右獻替爲多後徵弟沂爲禮部尙書賜濟楮幣以致政歸家從姪燧字允資歌詩俊逸尤工楷書見稱士林

贊曰柏家以孝義被召時柏忝與行列沐天語之褒嘉承彤廷之錫

宴選留拜春坊之命賜歸有寶楮之頒而伯父濟叨榮終始恩賜致政遭遇之隆盛矣至矣

明樓璉傳

樓璉字士連義烏人父光亨字景玄性警敏學詩於吳萊宋太史序其梅溪詩藁稱爲法度之詩璉好學善文從游宋太史爲同門所推洪武中由儒士召試累官翰林侍讀尋卒

明劉剛傳

劉剛字養浩義烏人刻苦攻學寡合少容嘗游京師學文於宋太史士林相與推薦卒無所就抱負而歸參議浦陽王應延教諸子久之爲鄉里誑誤法死京師

明葛信傳

葛信字誠夫東陽人以文辭知名請益於宋太史名稱士林薦授湘府紀善俄以疾卒於官次

明樓恕傳

樓恕字希仁義人喜攻文詞嘗游學蘿山不憚寒暑負笈往來士友稱之後隱居教授以師道自任焉

贊曰柏與璉剛信怨爲同門友而柏齒居少議論多所劇切而推譽則有過焉四人者或仕或隱知名於時今皆不可作矣而柏幸生人世而嘆所業之無成有媿於師友已夫

### 明傅藻傳

傅藻字伯長義烏人受業黃潛以才行見稱洪武初由本邑校官應召赴京累官監察御史遷武昌太守後超拜河南廉使以卒贊曰藻從碩師而遭際昌運致身一要可謂榮遇矣而其文章政事寂然無聞可慨也歎

### 明王杰傳

王杰字文英金華人文憲公柏之裔孫洪武中由明經薦授本郡學訓導遷盱眙縣訓導薦陞丹徒知縣以能聲稱尋罷歸永樂初應召入文淵閣纂修大典書成除翰林典籍掌文淵閣秘書秩滿致政歸

老士林榮之所著詩文有尙拙齋稿

明口秦傳

貝秦字宗魯金華人端嚴秀整文行過人由鄉貢進士爲校官永樂初薦擢國子助教尋陞司業六館之士翕然尊之咸以爲得師久之起拜祭酒名稱燁然

贊曰金華爲文獻之邦人材輩出杰以通經典籤翰林引年致政爲郡碩望泰經明行修典教國子由司業而陞祭酒可謂極儒臣之榮矣吾郡之士其亦有光耀云

明鄭楷傳

鄭楷字叔度浦江人自垂髫侍父貞孝受業宋太史善屬文工於筆札太史亟稱之縉紳推其學行達之藩府永樂初蜀王朝京師奏除王府教授王見之大喜有公來雪山重之稱寵恩禮過優渥特殊時賜教言以表其孝義褒其學行勸講十有餘年恭勤輔導終始不渝應教詞翰咸稱睿旨嘗云無媿潛溪潛溪蓋太史別號初太史以累

西行次夔州而沒旅葬於夔家累謫居茂州叔度啟王給道里費令太史孫恪遷葬成都命恪館於墓傍給田以供祭享復命叔度爲文以誌其墓已而尊爲賓師賜號醇翁久之王憫叔度年老奏陞長史致政還歸錫賚更蕃靡不周至復睿書歸來軒織錦成文以賜因以睿翰揭諸燕處之軒永樂乙酉同致政御史兄翰朝覲京師皇上嘉勞燕賞復賜爲善書朝野以爲榮兄沒綜理家政以詩書忠孝訓飭子孫諄諄懇懇衆皆悅服所著詩文蜀王賜名鳳鳴集弟棠柏

棠字叔美從宋太史游工古文辭太史稱其善於馳論永樂丙戌大臣薦於朝命纂修大典書成詔選次文士叔美名在第一廷試除翰林典籍掌文淵閣秘書時仁宗爲太子監國南京選該博儒臣更番進講且備討論典故叔美與王汝玉等九名在選中叔美每體程子崇政說書意言及政治仁宗屢加首肯嘗命代祀先聖顧羣臣語其至誠秩滿陞翰林檢討後以風疾辭歸仁宗卽位入朝特加賜勞仍以檢討致仕給傳送歸朝野榮之著有道山集金元史評侄燠好學

善書爲右族師學者尊之

柏字叔端力學耽經受學於朱長史聞考亭之學以究性理之旨旣而學文於宋太史太史教之作文必以六籍爲本明乎理以充其氣而以孟韓歐陽爲宗凡所爲文必合繕書以酬應所求及太史以累入蜀歛其所著以授柏有付子斯文之囑繼以父貞義代兄死難哀毀嬰疾無意進取縉紳朋舊每欲推薦輒以疾遜謝惟寤寐經傳潛心玩索以真知實踐行之於已而以孝慈友弟勸率羣從注善藥以施人至老不厭又卽施救急良方傳布遐遠或以其名達之蜀府賜問其兄長史叔度稱其疾以對主顧左右曰叔端可謂清逸之士人囚以清逸處士稱之晚年著書有聖朝文纂文章正原續文章正宗金華賢達傳進德齋稿子姑才學有稱

贊曰柏與二兄居同義聚學同碩師而叔度以所學講授王宮闡明聖道文章德行稱重川蜀叔美典籤秘閣載筆翰林學資啟沃文著朝野皆名成行立致政歸休柏才不逮兄學孤士望自甘恬退抱拙

守冲尚得天假餘年獲陪二兄杖履乎山水之間從事於几筵之末何其幸與

明杜桓傳

杜桓字宗表金華人耽經好學由郡庠應鄉貢入太學永樂初登進士第除趙府紀善王禮遇之爲文典雅詩尤俊逸詞林推譽之贊曰桓之從祖性原與其子仲成皆學行純篤而相往來於柏家桓以契舊嘗過麟溪聽其言論恂恂乎豈弟之君子也已而其文詞稱灑於時繼吾郡文獻之傳者柏於桓深有望焉

明周旼傳

周旼字中和浦江人以文辭知名尤工眞行書永樂初召入文館與修大典書成擢中書舍人書誥侍從幾二十年以老告歸詔令冠帶致仕士林以爲榮同邑陳鞅字子同才學與旼齊名同召修大典未及授任而卒縉紳惜之

贊曰柏與旼鞅有同邑之契二人昔在京時嘗和柏兄翰林檢討叔



美羅鱗歌寄至麟溪詞翰俱美珠玉粲然今敗列官近侍致政歸榮而與邑之賢俊教諭劉溥淵司訓林宜儒士張公器陳宗文爲文字之交往來觴咏以樂雍熙之治而輒未沾一命以沒何幸不幸之相遠也哉

補遺

明劉涓傳

郡志作金涓

劉涓字德原義烏人受經於許謙學文於黃潛淹貫經傳卓識過人隱居青村學者稱爲青村先生州郡薦辟輒懇辭謝曰儀尊青黃豈木所願耶吾髮已種種焉能驅馳簪組之間哉日游泳乎山水以終其身

贊曰柏觀朱太史記青村隱居稱涓爲安貞肥遯之士考其德而求其行信足有徵焉

金華賢達傳卷之十一

續金華叢書

明 鄭柏著

卓行

宋呂祖泰傳

呂祖泰字泰然金華人寓常之宜興慶元初兄祖儉以言忤旨安置  
瑞州祖泰徒步往省語其友曰自吾兄之取諸人箱曰我雖無位義  
必以言報國當少須之今未敢以累吾兄也及祖儉沒時周必大降  
少保致仕祖泰憤之乃上書論韓侂胄有無君之心請誅之又請誅  
蘇師旦召周必大有旨祖泰言語狂妄拘管連州諫議大夫程松與  
祖泰狎友懼累及乃奏祖泰有當誅之罪縱不殺猶當杖竄遠方乃  
杖配欽州及侂胄誅詔補上州文學改迪功郎監南岳廟喪母無以  
葬至都謀於諸公得寒疾索紙書曰吾與兄共攻權臣今權臣既誅  
死且不憾獨未能葬吾母爲可憾耳及卒尹王柁具棺葬焉  
贊曰□□□□□□□□有憂國之心憤權姦之誤國憫□□□□□

□□□□雖死不悔可謂卓絕行誼之士矣及乎權奸被誅雪冤授職而母亡身死其命也夫

宋黃中輔傳

邑志作浦江人

黃中輔字槐卿義烏人紹興中秦檜和議既成日使士大夫歌誦太平之美聞言其奸者捕殺之中輔作樂府題太平樓有快磨三尺劍欲斬佞臣頭之語幾陷禍不測晚歲屏居山園號細高名其齋曰轉拙檜死名聞於朝將授官而卒

宋張垓傳

張垓字伯廣金華人以恩入官呂祖儉貶時在建康帥幕聞之卽解裝輕貨追至信安贈之陳亮繫大理獄垓不避禍奔走經營卒脫其難葉正則未遂時家甚貧垓館於家後正則帥建康辟垓爲湖廣總領淮東轉運同幹辦公事至老奉祠

宋汪大度傳

汪大度字時法金華人受業呂祖謙號獨善慶元初呂祖儉忤權奸

貶韶州大度往送之件送者凌辱祖儉大度以義折之直欲與之坐獄朱熹致書深加敬歎弟大章

大章字約叟亦從祖謙游祖儉卒於貶所大章距秋試纔四日舍之就道護喪以歸後故人路知監卒於斬喪不能歸大章走斬載其柩歸割地葬之

宋陳昭傳

陳昭字襲明義烏人從父錫登進士第爲復州教授昭少游太學偕陳東上書乞斬六賊不用而歸尋以進士調錢塘尉御史陳堯臣爲權倖所擠下其子於大理獄昭納告身贖之再調戶部瞻軍酒官用薦改宣教郎卒

贊曰忠烈慷慨不顧利害惟義是從可不謂之卓行乎若中韓三尺劍斬佞臣頭之語垓之解脫陳亮死獄大度之折祖儉伴送大章舍秋試而護祖儉喪昭之納告身以贖堯臣子之罪是皆卓行之君子者矣

宋杜伯僖傳

杜伯僖字安常東陽人宣和中桐廬盜起獻策制勝授成忠郎紹興中妖賊嘯聚鄉邑帥將欲殄滅其眾伯僖曰愚民無知而從妖賊殲其渠魁其眾自散多殺何爲將聽而戢兵鄉民獲全子幼常幼偉孫士賢俱右科登弟幼常至公安令幼偉至武翼大夫士賢至盱眙令士賢子榮祖官至岷縣丞

宋汪渙傳

府志作江渙

江渙字德濟武義人父號汪鐵棒渙幼時以杖繫石石碎而杖全陸寇起縣檄其父子防守以少擊眾保全鄉里寇平渙効勇得官後隸統制鄺瓊麾下及瓊謀叛殺參謀呂祉舉軍降劉豫渙將出境謂其屬曰吾儕誓忠義死國詎可爲降俘夜與其徒還得祉之首至楊子江無船可渡埋祉首於江臯識其處遂解甲揭鎗浮渡達行在所時方收祉家屬鞠之渙辯其事命押渙取祉首得之埋處已不可辨獨祉女言父行時戴華陽巾緣以紫羅紉以皂線按驗不誣遂放其家

於是出獄者咸拜渙曰微公吾曹安能生忠義得白皆公力也後任廣東統領克海寇以一矢殪其渠魁卒於官

宋陳慎傳

陳慎永康人宣和中納粟賑飢授忠州助教寇亂屍骸平野慎率二子收瘞之紹興中二子良臣良能並登進士第良臣授吉州助教良能授劍浦縣主簿孫五人琛璆□□□皆淳熙登第俱將仕郎良臣遇乾道大旱爲粥以活鄉民隣有逋稅悉代其償復建橋三處曰上降曰下降曰中降豨道以便行役其他施惠不可悉舉子孫蕃衍儒術不替

宋吳圭傳

吳圭字彥成義烏人好施尚義太學程生從故人貸錢三十萬將葬其親同舍給而取之使責償於其兄兄弗與圭如其數代償之人稱其義

宋申屠大防陳宗譽傳

申屠大防東陽人妙於鎗法宣和初草寇竊發挺身破賊鄉里賴之  
帥闔檄權東陽縣事與薛帥約往永康收賊大防先往薛後期無援  
大防戰死贈武經郎三子邈邈廻皆承信郎

陳宗譽字彥聲東陽人宣和間盜起安撫使命宗譽集民兵以衛鄉  
井民賴以安欲官之辭不受建炎初盜復起盡力捍寇所立尤奇偉  
乃論賞則又固辭寇平補承信郎終承節郎而卒子六人孫男女四  
十二人子孫之盛鄉里罕比云

### 宋項德傳

項德武義人宣和庚戌盜發封帛源陷婺州邑亦隨沒德率潰眾禦  
之破賊於城隍廟東抗江蔡西拒董舉北捍王國大敗賊斬首獻賊  
不可勝計賊聞其鉦相率遁去方縉甲謀復鄉邑適王師至謀合而  
殲之賊聞盡銳邀德於黃姑嶺德力戰死邑人哭之聲震山谷遂畫  
德像於城隍廟祀之

### 宋陳嚴傳

陳嚴字伯威東陽人狀貌奇偉膂力絕人宣和庚子陸寇陷婺州羣盜蜂起嚴與弟叟倡義集鄉兵禦之大破賊徒宣撫童貫上其功授承事郎弟士澄辟置南劍州都巡檢使

宋王豪傳

王豪東陽人刺史霆之祖也陸寇倣擾豪集眾捍禦有功補忠翊郎連帥嘉其材俾攝縣事繳授四明巡檢不赴

宋孫琛傳

孫琛字獻之東陽人宣和初盜發青溪山居之民因以爲亂琛出身捕討之稍戢而其隣以富自雄弗協陰結諸惡少爲羽翼聲勢相倚賊乃枝蔓琛之故人有吳評事者以訪琛而來道過白溪遇賊首朱氏諭以理竟爲所害已知琛與吳善益疑忌謀諸其隣邀與飲逼殺之乃合章村洞諸黨焚掠其家乘勢攻邑城勢甚猖獗其子邦實疾走京師以其事聞授琛成忠郎并官廷實爲進義校尉

宋許瓊傳

東陽縣志瓊作璠



許瓊字世英東陽人剛毅有力善騎射宣和中懷德鄉寇起瓊集民壯攻討之鄉賴以全隨奉檄援郡城有功上其事補秉義郎攝郡事既而睦寇入境屢挫其鋒久之以兵食不繼而盜益兵攻城瓊力戰死之屍猶僵立如生能載所乘馬而歸至今廟食于鄉子孫蕃衍爲邑巨族

元丁廷玉傳

丁廷玉義烏人元季盜起縱火剽掠人民震攝廷玉散資募眾殺賊以保鄉里事聞授武義縣醫學教諭

元吳謙傳

吳謙字仲恭浦江人世業儒父蜚聲宋秘書省較勘文字與謝翱友善翱寓謙家尋卒無嗣謙資營喪葬刻石誌墓復彙士友哀誄爲哭謝編時人義之

元俞時中傳

俞時中字器之金華人年十六宋季盜起晝夜避居山谷元軍有直

其叔母劉所藏處將殺之時中聞之號泣急赴謂軍士曰此吾母也  
卽欲殺當以身代軍士壯其言釋劉而還負之以行北至京師語其  
事公卿皆歎賞奇之使受學羅郕中所時羅方貴幸嘉時中才命爲  
其婿久之用薦者入翰林纂修本草遂爲太醫令吏遷都水監用例  
補官監通州樂歲倉秩滿因求便養得諸暨州判官以歸還家父母  
及劉俱喪乃爲位制服晨夕號慟如初喪聞者皆流涕

### 明吳綺傳

吳綺字季可蘭谿人國初越國公鎮嚴州蘭谿民有越境就食者邏  
卒獲之以爲謀欲置之死綺見部領謂曰此平民耳無能爲也乞縱  
之全活數十人旣而越國下蘭谿遊兵侵擾民居綺趨見越國願嚴  
軍禁以安民業越國授以大杖令約束軍旅由是軍皆斂戢民安堵  
焉

### 明鄭源傳

鄭源字仲本浦江人隱居玄麓山採藥修傳以濟人國初駐軍婺州

軍餉不繼勸閭右輸助郡守王宗顯以私憾視他姓十倍徵源家從弟漢械繫督責源聞趨赴願以身代不許號哭於庭宗顯爲緩其徵後從弟渙以家陪納金銀督責仍曝於烈日又往請代不允卽自解衣曝赤日中兄弟俱往身相覆以代人多義之子杖詩文雅俊宋太史以女妻之

### 明吳志德傳

吳志德字惠卿浦江人幼尙氣節從祖直方器愛之元季盜起志德率義勇保安鄉里王師下婺州志德領眾迎謁從取諸暨及處州皆著勞績戮僞將獻馘轅門命志德爲統翼左元帥尋以疾辭歸子允和允權皆以才行稱於時允權子緯字克文事母盡孝齊家有法家被回祿先奉祠堂神主後救私室未幾營建祠宇而後構其所居人以爲知所先後而親賢友善詞翰推著士林云

### 明蔣鏞傳

舊本作可大字闕今從邑志及宋景濂蔣公墓誌銘改正

蔣鏞字可大浦江人勇敢強毅元季盜起倡眾捍衛鄉井李文忠兵

至同吳志德率謁麾下遂從取傍郡皆有功授浦江翼副元帥未幾以病辭歸休養田廬又十年而卒子七人璋琮瑛瑪城琇理鏞歸胡大海爲之請於朝命城襲其職

明朱世遠傳

朱世遠永康人貲甲於鄉歉歲輒濟貧乏鄉里稱之元季處寇侵永康散貲募眾同呂用明禦之方巖山下與王師夾擊殲之戊戌冬王師下婺城徵授吉州知府以廉能著

明王威傳

府志作義烏人

王威字仕龍永康人倜儻有勇力元季處寇犯永康威集義兵拒戰黃龍寨破之戊戌太祖取婺城威率眾歸附從征有功除昭信校尉後陞紹興衛後所副千戶

贊曰□□□□排難解紛賙貧賑貸見義必爲非有卓行之人而能若是乎若伯僖渙綺之排解慎父子之瘞骸食餓時中之赴救劉母仲本之代弟受責圭之代償謙之友義誠所謂卓行者矣至於寇盜

繼起倣擾鄉邑非大防宗譽德嚴豪琛瓊禦之於前廷王志德可大  
王威世遠捍之於後七邑之民何以遂其生乎居吾郡者其可不知  
所自哉書之卓行俾不忘其功云

金華賢達傳卷十二

永康胡宗林居清道光鄭氏刻本校錄

有明開國浦陽義門之聲聞天下其族有稱清逸處士者名柏字叔端著有金華賢達傳十二卷金華轄邑有八與宋濂浦陽人物記傳錄一邑者不同人物記傳文學此傳儒學人物記傳貞烈此傳卓行其分類名稱亦不同所同者每人或分傳或合傳傳後各系以贊自漢唐以來以至明初懿行嘉言粲然具備洵鉅製也是書成于明宣德時合溪黃孟舒始刊行歷百餘載鄭思俊加以校訂劉涓補其缺略康熙戊子鄭璧重付剞劂道光乙酉夏其裔孫祖模等又鳩工開雕余得結一廬藏本彙入續金華叢書尚有續文章正宗四十卷程敏政稱其去取精當今失傳季樵胡宗楨